


# NDEKE YA NGITUKULU

 Beto vwanda kaka ya kutelama mwa ntangu fioti. Mfumu ya natalu, beto me kwisa diaka na mvwandulu ya Nge ya Kinzambi na nzila ya kisambu; ntete, samu na kuvutula matondo samu na nyonso yina Nge me sala samu na beto, mpe samu na zola ya nene na kati ya ntima ya beto samu na Nge mpe na Ndinga ya Nge. Mfumu, bantu yayi, na nkokila yayi, yina mu zola na ntima ya munu ya nyonso, ba me bika nyonso mpe me kwiza samu na kuvwanda na kati ya kivinga ya mwini ya ngolo, mpe nyonso, samu ti bawu zola Ndinga ya Nge.

<sup>2</sup> Mpe beto me kwiza samu na kusambila samu na bambevo, na nkokila yayi, Mfumu, mpe bantu ya nsatu. Bika ti ya vwanda ve na muntu mosi ya kulemba na kati ya beto na nsuka ya lukutakanu yayi. Pesa bawu musendo samu na kukwikama ya bawu, Mfumu. Zonza na beto na nzila ya Ndinga ya Nge, mpe pesa beto ngolo, Mfumu, na yina beto ke na kukwenda, na kunataka nsoni. Wapi bweso na kusala yayi! Beto me lomba na Nkumbu ya Yesu. Amen. Beno lenda vwanda.

<sup>3</sup> Mu lendaka ve kuzwa bampova, ya kieleka, samu na kuvutula matondo na nkonga ya bantu mutindu yayi, bayina ke kwiza mpe ke vwanda na yinzo yayi. Mu zola tuba, ti, mbasi. . . To, beto ke kwenda kuna na Topeka, na Kansas, samu na lukutakanu yina ke landa, mpe ya ke suka na Lumingu ke landa. Mpe na manima beto ke kwenda, na kukatukaka kuna, na Philadelphia.

Mpe, ntangu yayi, beto na kutala fwana kwenda na lweka yankaka ya mubu, kuna na Kenya, mpe na Tanganyika, mpe na Ouganda, na makanda na kati kuna. Mpe ntangu yayi bawu kele na kukolama ya fyoti na ba-Mau Mau. Mu lenda kota kuna ve mutindu missionary, kasi mu ke meka na kukota kuna mutindu muzombi. Beto ke kwenda, mpe ba ke na kukubikaka yawu.

<sup>4</sup> Ntangu nionso, mu ke kwendaka mutindu missionary mpe mu ke kwendaka na kuzomba, na mbala yayi mu ke kwenda mutindu samu na kuzomba, mpe kuvwanda missionary. Na yawu, kuna—kuna, na mutindu nionso beto ke kota kuna samu na bawu. Mpe Mpangi Mattsson-Boze kele kuna na kati ya kisalu, na kumekaka samu mu kota, ke na kukubikaka safari ti mu ke kota samu na kuzomba. Na yina, kuna, mu ke kota samu na safari yayi, mpe yandi ke tuba, “Mpangi ya beto Branham kele na yinsi.” Beto ke kwenda na ambassade, “Ya lenda vwanda mbote kana ti beto kuzwa lukutakanu ya fioti awa kisika mosi?” Beno me mona? Ya ke kota na kubanda kuna, mpe ya ke landila mutindu yina. Na yawu beto zaba ve kana ya ke vwanda to ve, kana beto ke lenda na kusala yawu, to ve. Beto ke na kumeka.

Mpe mu vwanda me lomba Mfumu, kana ti kima kusalama ti yandi kulenda ve, na yina ya ke vwanda kidimbu samu na munu ti mu fwana vutuka awa na Jeffersonville mpe kulonga *Bampungi Sambwadi*, na kati ya Ngonda ya sambwadi to na Ngonda ya nana, kisika mosi na kati kuna.

<sup>5</sup> Mpe kuna, kana beto ke sala yawu, beto ke mona yawu bubu yayi, beto ke meka na kuzwa kivinga ya lukolo yayi awa yina kele na klime, samu ti ya ke vwanda kieleka mbote mpe na madidi. Bantu kumi na tanu to kumi na nana ya bankama lenda vwanda. Mpe ya kele na klime, kisika ya malu-malu, kaka pene ya babloke tanu ya balupangu na awa. Mpe kilumbu mosi beto lombaka yawu, mpe bawu zolaka ve kubika beto kuzwa yawu. Mpe ba me katula na kimvuka ya bantu ke bakaka balukanu muntu yina vwanda zola ve ti beto kuzwa yawu. Na yawu ntangu yayi, muntu yina kele kuna ntangu yayi me tuba ti beto lenda kuzwa yawu ntangu nyonso yina beto zola kuzwa yawu. Na yawu beto kele—beto kele na kiesa mingi na kuzwa yawu. Mpe na yawu beto lendaka kuzwa yawu na ntangu yayi, mpe mbala mosi na Ngonda ya sambwadi, mpe kuzwa . . . Bantu yikwa ke vwanda na kusambila, kana ya kele luzolo ya Mfumu ntangu yayi, kana dyambu simba ve samu na beto?

<sup>6</sup> Beno zaba, mu ke zolaka Arizona. Ya kele kizunga mosi ya kitoko. Mu ke zolaka ntangu nionso kuvwanda kuna.

Kana nge lenda matisa yawu mwa fioti, Mpangi Ben, kana nge lenda, kana ya ke . . . Oh, yina . . . Yinga, tata. Yinga. To, muntu nionso yina ke kipeke yawu, lendaka bongisa yawu kaka mwa fioti, samu ti mu me katuka kuna ya kele kieleka . . . [Muntu mosi me tuba, “Ya kele bande, mpangi.”—Mu.] Yinki nge me tuba? [“Ya kele kaka ba-bande.”] Oh, kaka ba-bande. Oh, awa kele na mosi yankaka na zulu awa. Lemvo. Yinga, Mpangi ya bakala Ben. Na yawu mu . . .

<sup>7</sup> Mu me katuka na Arizona, ntangu mu ke kwizaka awa, ya ke salaka ndinga ya munu kukangama mwa fyoti, ya kele samu na nsobolo ya klima. Awa beto madidi, ke kumaka pene makumi nana na sambwadi na makumi yivwa, mpe bantangu yankaka nkama na zulu ya nkama. Mpe kuna ya ke kumaka tii na zelo, mpe kuna bantangu yankaka, na ntalu, makumi zole na mosi na zulu ya nkama ya madidi. Beno ke zinga kaka na yisi ya tenta ya oxygene. Mpe kuna kana beno katuka kuna, na awa, beno zaba wapi luswaswanu ya nene ya ke sala na kati ya beno. Na yawu ya ke kwamisa beno na ndinga, mpe nyonso yina.

Vutula yawu kisika ya vwandaka, kana nge zola, Mpangi Ben. Mu me sala yimbi na kumatisa yawu. Mu vwanda banza ti ya vwandaka yina, kasi na zulu *awa* ya kele kisika ba ke bongisaka yawu.

<sup>8</sup> Ntangu yayi beno sambila samu na beto, beno nionso. Mu ke sepela mingi na beno. Billy vwanda tuba na munu na muntu

natilaka beto kitunga ya ba-peche, mpe kaka mwa makabu yina beno . . . Mu lenda tonda beno mingi ve. Mu—mu zaba ve mutindu ya kusala yawu. Mpe mu—mu ke kukiwaka ya kulunga ve na kubaka bima ya mutindu yina na beno. Mu ke sambila ti Nzambi kusakumuna beno, mpe mu zaba ti Yandi ke sala yawu, samu ti Yandi tubaka, “Bambala nionso beno me salaka yawu na bana ya bayayi, beno me sala yawu na Munu.” Mpe Nzambi ke sakumuna beno, mu ke kwikila.

<sup>9</sup> Mpe Arizona na kuvwandaka kizunga mosi ya mbote, ya kele na kima mosi ke kondwaka munu, ya kele, beno nionso. Ya kele kieleka. Beno nionso ke kondwaka munu. Mu—mu ke kipe ve kisika mu ke kwenda, mu—mu . . . ya kele ve, ya kele beno ve. Mu kele na bampangi, bisika nionso na yinza, kasi ya—ya kele ve—ya kele ve beno nionso. Ya kele na kima mosi na yina me tala mwa nkonga yayi yina kele kaka . . . Mu zaba ve. Mu ke banzaka na beno.

<sup>10</sup> Mpe na Tucson, ya kele mbanza ya kutambula, beno zaba, mpe mabuundu ke benda, beno zaba. Ya kele mwa mpasi. Bawu kele na kimpeve mingi ve; mpe, samu ti ya kele na kuswana, ya kele ngolo mingi; mpe ya ke salaka yawu mpasi. Kana mu zolaka kuzwa beno nionso, mpe dyaka dibuundu, na manima kuzinga kuna, mu banza ti ya ke vwanda mbote mingi. Beno me mona? Kasi mu banza, ntangu nionso ti yayi ke vwanda dibuundu, mpe ti beno nionso ke na kwiza dyaka, mu ke vwanda dyaka awa, tii Yesu ke kwiza.

<sup>11</sup> Na yawu beno sambila samu na munu, mutindu mu me tuba yawu ntama mingi ve. Mu zola kuvutukila yawu ve, kasi ntangu mu ke kumaka na ntwala ya beno, mu—mu ke kumaka ya kudasuka, mu ke kumaka ya mawa, mpe ya kilengi, mpe na mwa bipale, mpe. Mu kele yawu, na kubanda, na yawu mu . . . ya ke salaka munu nionso ya kumwangana na kati. Kasi kuzaba ti kisika nionso yina mu lenda kwenda . . . Mu kele na nkonga ve na zulu ya ntoto, ti mu zaba, yina ke simbidilaka munu mutindu nkonga yayi. Ti—Ti Nzambi kubika beto kuvwanda ya kukabuka ve, ti, na Kimfumu yina ke na kwiza, ti beto vwanda kuna kintwadi; ya kele kisambu ya munu.

<sup>12</sup> Na kuvwandaka awa kyelo, mu vwanda solula na Bill Dauch kaka mwa ntangu fioti me luta ntete mu twadisa dyaka, muntu na Klisto, na kivinga yankaka yina. Kasi na kuvwandaka kuna na kusolulaka na yandi, muntu ya bamvula makumi yivwa na mosi, yandi tubaka, “Mu—mu ke na kulembaka. Meso ya munu kele ve mutindu ya zolaka vwanda.”

Mpe mu ke banza, mwa bamvula me luta, mu kwendaka na yandi ntangu yandi kuzwaka kulemba ya ntima nionso mpe ntima kukangamaka, yandi vwanda kufwa. Mpe dokotolo ya kieleka yina vwandaka bukisa yandi, yina tubaka ti yandi lendaka beluka ve, dokotolo yina me kufwa. Mpe awa kele ya

kuvwanda Bill Dauch, beno me mona, ya bamvula makumi yivwa na mosi. Mu tubaka, “Bill, nge kele dyaka ve mfunu na ntoto na mutindu ya kusala mambu ya mutindu yina. Kasi mu ke lomba yayi, “Ti Nzambi pesa nge ngolo,’ samu ti nge ke zolaka mingi balukutakanu.” Muntu ya bamvula makumi yivwa na mosi ke sabukaka yinsi na tomabilu, na mwini ya ngolo, ya kuyuma, na madidi, yandi ke kipe ve, ata nionso yina ya kele, samu na kuwa Ndinga. Nzambi kusakumuna moyo yina ya kikesa. Ntangu yayi mu kele ve . . .

<sup>13</sup> Mu kele na lemvo mosi dyaka ya kulomba, samu mu simbaka beno mutindu mu salaka na suka yayi, bangunga tatu. Mpe mu vwanda me sala ludedomo ve na nsangu, samu ti mu me zenga yawu, mpe me bika ndambu ya yawu, mpe me bika ndambu ya yawu, mpe nionso yina. Ya kele samu na yina mu tubaka na bawu na kukanga bande. Mu ke vutukila yawu kisika mosi kisika ya kele madidi to kima mosi. Mpe mu—mu—mu vwanda lenda kuwa Mpeve, kasi mu vwanda tala beno mpe na kuzabaka ti beno vwanda sala mupepe mpe zabaka ti beno vwanda tala tiya, mpe—mpe yina mwangisaka kaka munu na bitini. Mu zola ve ti beno kutala mpasi; mu—mu zola ti beno kuvwanda mbote. Beno me mona? Mpe yina ke salaka munu mpasi.

<sup>14</sup> Mutindu, ntangu mu ke monaka bambevo; kana mu lenda ve—kana mu lenda ve kuwa mpasi ya bambevo yina, mu lenda sala bawu ata mbote ve. Mu—mu fwana kuwa mpasi ya bawu. Mpe mutindu mosi na—na beno; mu—mu fwana kuwa mpasi ya beno, to mu lenda vwanda ve mpangi ya beno ya bakala. Beno me mona? Mu—mu fwana kuwa mpasi ya beno. Mpe, mu ke salaka yawu; Nzambi zaba ti ya kele kieleka.

<sup>15</sup> Mpe ntangu yayi, na nkokila yayi, mu ke sambila samu na bambevo.

Mpe mu zola . . . muntu yayi, mpe kusakumuna bantu yayi, mpe Mpangi Collins, mpe Hickerson, Mpangi Neville, Mpangi Capps, ba-administrateur, mpe nionso, samu na bansangu ya mbote yina me kwiza, na mutindu beno ke na kusungika, na kuvwandisa dibuundu, mpe mutindu nionso kele na kisika ya yawu. Mu ke tonda beno bantu. Ti Mfumu kusakumuna beno na kumeka na kusala lutumu. Mpe mukanda na manima ya mukanda yina ke kwiza na Tucson, na munu, “Mpangi Branham, ya kele ve mutindu ya vwandaka. Ya kele na luswaswanu mingi, sensasyo mosi ya Mvwandulu ya Nzambi ya kusakumuna.” Mpe mu ke—mu ke vutula matondo samu na yawu. Ti Mfumu kusakumuna beno ntangu nionso!

<sup>16</sup> Na yina, ntangu yayi, na nkokila yayi, mu vwanda tanga awa na Masonuku mwa kisika mosi, samu—samu na kusala mwa bampova, samu na kuzonzila mpe kutanga Masonuku, mpe kuna mu banza mwa Masonuku, mpe kuzonza na beno mwa ntangu fioti mpe na manima kusambila samu na bambevo. Kasi kaka

na mwa ntangu fioti; mu ke na kotalaka mbote montele, mpe mu ke meka na kusala yawu na nswalu nionso na mutindu mu lenda. Kasi mu ke banza ti ntangu nkonga ya bantu me vukana kintwadi, kukondwa kutanga Ndinga to kusala kima mosi, mwa nkindusulu, lukutakanu ke vwanda ya kulunga ve.

<sup>17</sup> Mingi na kati ya beno me vingila. Mingi ya beno kele na bakilometele ya kutambula dyaka na nkokila yayi. Mutindu mu ke zolaka yawu! Mu ke tala mpe mu ke mona konso muntu, mpe mu ke banza. . . Kuna na Arizona, mu banzaka, “Ntangu mu ke mona dyaka yandi, mu ke kwenda kaka kuna mpe mu ke ningisa kaka diboko ya yandi mpe mu ke kanga yandi na laka.” Mpe awa beno kele ya kuvwanda awa, mpe nani, wapi kisika mu lenda, beno zaba? Mu zaba ve na nani kubanda, mpe na yina. . . wapi mutindu ya kubasika na yawu. Kasi, yinga, mu zola beno. Nzambi zola beno, mpe.

<sup>18</sup> Ntangu yayi mu banza, kana mu me zimbana ve, kana mu sonikaka Masonuku ya yimbi ve awa, Mu zola kutanga na ya Ntete ya Corinthiens, na kapu ya 1te, na kubandaka na nzila ya 18, mpe kutanga dyaka ya Zole ya Corinthiens 12:11, samu na kubaka dilongi. Ntangu yayi kana mu lenda kuzwa yawu na nswalu kaka, mpe kuna beto ke tanga, mpe na manima beto ke sambila mpe kubanda mbala mosi, mu ke zonga na beno kaka na mwa ntangu fioti na zulu ya dilongi mosi ya fioti. Na Ntete ya Corinthiens, kapu ya 1te, kubanda na nzila ya 18.

*Samu ti malongi ya kulunsi kele samu na bawu yina ke kufwa bulawu; kasi na beto yina me kuzwa mpulusu ya kele ngolo ya Nzambi.*

*Samu ti ya kele ya kusonika, mu ke bebisa ndwenga ya bantu ya ndwenga, mpe ke kumisa mpamba lubakusu ya muntu ya mayela.*

*Wapi sika kele muntu ya ndwenga? wapi sika kele musoniki? wapi sika kele muswanisi ya yinza yayi? Nzambi me kumisa ve bulawu ndwenga ya yinza yayi?*

Mu lenda vutukila dyaka yawu? “Nzambi me kumisa ve bulawu ndwenga ya yinza yayi?” Na yina yinki kele ndwenga ya yinza yayi? Bulawu.

*. . . Nzambi me kumisa ve bulawu ndwenga ya yinza yayi?*

*Samu ti na manima ya yina na ndwenga ya Nzambi yinza na ndwenga zabaka ve Nzambi, kasi ya sepelisaka Nzambi na bulawu ya malongi na kuvuukisa bawu yina me kwikilaka.*

Mu lenda tanga dyaka nzila yina? Beno kuwa mbote-mbote.

*Samu ti na manima ya yina na ndwenga ya Nzambi yinza na ndwenga zabaka ve Nzambi, ya sepelisaka*

*Nzambi na bulawu ya malongi na kuvuukisa bawu yina ke kwikila.*

*Samu ti Bazwife ke lomba kidimbu, . . . ba-Grec ke sosa ndwenga:*

*Kasi beto ke longi Klisto ba komaka na kulunsi, na Bazwife dibaku, . . . na ba-Grec bulawu;*

*Kasi na bawu yina ba bokilaka, nionso zole Zwife mpe Grec, Klisto ngolo ya Nzambi, mpe ndwenga ya Nzambi.*

*Samu ti bulawu ya Nzambi kele ndwenga mingi kulutila ya muntu; mpe kulemba ya Nzambi kele ngolo mingi kulutila ya muntu.*

<sup>19</sup> Mpe na Zole ya Corinthiens kapu ya 12, na nzila ya 11, Paul ke na kuzonza.

*Mu me kuma kilawu na kukikembilaka; beno me kwika munu, samu ti mu zolaka vwanda ya kusiika na beno: samu ti na kima ve mu kele na manima ya ntumwa ya kulutila nene, ata ti mu kele kima ve.*

<sup>20</sup> Beto sambila. Mfumu Yesu, bwela na mwa bampova yayi, na nkokila yayi, yina zonzamaka na bilumbu yina me luta, na nzila ya ntumwa ya nene Paul, ti beto lendaka kwenda na ntuala na kuwaka yawu na nkokila yayi, na kutulaka yawu na baluzingu ya beto, ti beto lendaka vwanda kisalu ya Nzambi, ya kusala na mutindu na kati ya yina Yandi soolaka samu na beto na kuvwanda. Samu ti beto me lomba yawu na Nkumbu ya Yesu. Amen.

<sup>21</sup> Mu ke longi na nkokila yayi na mwa ntangu fioti, kana Mfumu kuzola, na zulu ya dilongi: *Ndeke ya Ngitungulu*. Ntangu yayi, yina kele kieleka kisono mosi ya yimbi, ya ngolo na kubaka, kasi yina ke, mu banza, ya ke lakisa mingi fioti mutindu yina mu zola kuzonzila yawu.

<sup>22</sup> Beno zaba, ya kele na bima mingi, bubu yayi, ke sala ti bantu kuma *bandeke ya ngitungulu*, mutindu beto ke bokilaka yawu. Mpe nzonzolo yina, kana muntu me kuwaka yawu ntete ve, ya zola kutuba yina kele “mutindu yankaka,” muntu yina kele “ngitungulu” na muntu yankaka. Mpe kukondwa ntembe ti mingi ya beto kele ngitungulu, na mosi na yankaka.

<sup>23</sup> Mpe, ntangu yayi, mu vwandaka tambula na bala-bala kilumbu mosi na Los Angeles, na Californie, mpe mu monaka kieleka muntu mosi ya ngitungulu, yina vwandaka sala mambu ya ngitungulu. Mpe yandi vwanda tambula na bala-bala, vwanda sala greve ve, kasi yandi vwanda tambula kaka mutindu muntu vwanda tambula ya yandi na manima ya midi. Mpe mu kwendaka na lweka yankaka ya bala-bala, samu na kumona yina yandi vwandaka sala. Muntu nionso vwanda baluka, vwanda seka yandi, samu na bungitungulu ya yandi.

Mu talaka ti yandi vwandaka na kidimbu na mantwala ya yandi. Mpe mu banzaka ti mu ke tala yina bantu nionso vwandaka seka, muntu yayi ya ngitukulu, ya mutindu yankaka. Mpe na yina yandi vwandaka. . . Mu talaka yandi mutindu bantu vwandaka tala yandi, ba vwanda seka yandi, mpe—mpe, kasi yandi monanaka vwandaka na mutindu mosi yankaka ya kuseka, kuseka ya kilengi. Kuseka yankaka yina bantu vwanda pesa yandi vwandaka mingi mutindu samu na kuseka yandi, kasi yandi monanaka vwandaka sepela na yina yandi vwandaka sala.

<sup>24</sup> Mbote, ya kele mingi ya kubanza, ntangu muntu ke sepela na yina yandi ke na kusalaka kele kieleka. Ata ti yandi vwanda ndeke ya ngitukulu samu na muntu yankaka, kana yandi ke sepela na yina yandi ke na kusalaka kele mbote, na yina beno bika yandi kuvwanda na yawu.

Mpe na yina mu kumaka pene-pene ya ntwenya ya bakala yina, mu talaka na. . . na zulu ya ntulu ya yandi awa, na zulu ya plake to dibaya, ba sonikaka, “Mu kele kilawu,” mpe na yisi, ya vwanaka, “samu na Klisto.” “Mu kele kilawu,” na bisono ya nene; kuna na yisi, ya kutuba, “samu na Klisto.” Mpe bantu nionso vwanaka seka yayi.

<sup>25</sup> Mpe na yina ntwenya ya bakala vwanda nwana na kuluta na nkonga ya miseki mpe bavwenzi, Mu me baluka na kutala yina vwanaka na mukongo ya yandi. Mpe ya vwanaka na kidimbu mosi ya kiuvu ya nene na mukongo ya yandi, mpe kuna na yisi, yina vwanaka tuba, “Ntangu yayi ya nani nge kele kilawu?”

<sup>26</sup> Mbote, mu—mu banzaka ti yandi vwanaka na kima mosi kuna, beno me mona, kasi yandi monanaka vwanaka na kilengi ti yandi lendaka vwanda kilawu samu na Klisto. Mpe ya kele yina Paul tubaka ti yandi kumaka, “kilawu” samu na Klisto.

<sup>27</sup> Mpangi Troy, ya Bantu ya Mumbongo ya Nsangu ya mbote ya Muvimba, nkundi ya munu mosi ya mbote, yandi—yandi kele kitekisi-ngombe. Mpe kilumbu mosi na kuzengaka ngulu, yandi kuzwaka mutindu mosi ya miklobe na diboko ya yandi. Bakala yina zaba, to kento, lendaka zaba mutindu ya miklobe ya vwanaka; kasi ya—ya ke kudia beno nionso. Na yawu, samu na kuvulusa luzingu ya yandi, ba zolaka zenga misapi tatu. Mpe yandi kele kaka na misapi zole na diboko mosi, kasi yandi kele dyaka kitekisi-ngombe.

<sup>28</sup> Mpe ya vwanaka na ntwenya mosi ya Allemagne yina vwanda salaka na yandi na boucherie, kuna na Los Angeles, na yawu yandi—yandi vwanda mekaka na kutwadisa ntwenya ya Hollandais yina na Klisto. Mpe yandi tubaka ti yandi vwanaka “Lutherien,” mpe ya vwanaka mbote mingi na yandi. Yandi vwanaka sepela ti yandi vwanaka Muklisto, samu ti yandi vwanaka ya dibuundu ya “ba-lutherien”, mutindu yandi tubaka yawu. Na yawu nkokila mosi Mpangi Troy kuzwaka bweso ya kunata yandi na dibuundu.

<sup>29</sup> Nkumbu ya Yandi vwandaka Henry. Mpe Henry, na Allemagne, kele “Heinrich,” mpe na yawu ba vwanda bokilaka yandi “Heini.” Beno me kuwaka nzonzolo yina. Yandi tubaka, “Heini, wapi mutindu samu na kukwenda na dibuundu na munu na nkokila yayi?”

<sup>30</sup> “Mbote,” yandi tubaka, “Mu banza ti mu ke kwenda.” Na yawu yandi kwendaka na lukutakanu mosi ya mutindu ya ntama kisika ba vwanda kuzwa lukutakanu ya bisambu, mpe kieleka yandi kotaka na kundima, mpe pesaka ntima ya yandi na Klisto.

Oh, kilumbu yina vwandaka landa, ntwenya yayi ya Hollandais vwandaka sepela yandi mosi. Konso ntangu fioti yandi vwanda tambula na kati ya kivinga, na maboko ya yandi na zulu, na kutubaka, “Lukumu na Nzambi! Matondo na Nge, Mfumu Yesu!” mpe yandi bendaka bukebi ya bantu nionso, ya bantu nionso kuna.

<sup>31</sup> Beno me mona, yandi kumaka ndeke ya ngitukulu samu na ekipi nionso ya bitekisi-ngombe. Mpe yandi zolaka vwanda ke na kuzengaka ngombe, mpe yandi ke banda na kubanza na Mfumu, mpe yandi ke banda na kudila. Yandi ke bika mbele na yisi, mpe ke mata mpe ke kulumuka na couloir, kilawu ve, kasi kaka samu na zola ya Klisto, na kutubaka, “Oh, mutindu mu zola Nge, ‘Yesus!’” Beno zaba, ke kwenda kaka na ntwala mpe ke vutuka.

<sup>32</sup> Mpe mfumu ya kisalu kwizaka mpe monaka yandi kusala yayi, mpe mutindu yandi vwandaka kulumuka, na kudilaka. Mpe, mfumu ya kisalu, yandi talaka ata mbala mosi ve mfumu; yandi vwandaka banza na Yesu. Mpe yandi bandaka kuna, na maboko ya yandi na zulu, mpe masa ya meso vwanda kulumuka na matama ya yandi, vwanda tuba, “O Nzambi, mutindu mu zola Nge!”

Mpe mfumu ya kisalu me tuba, “Heini, yinki na yinza me salama na nge?” Yandi tubaka, “Bantu nionso ya—ya ekipi ke na kuzonzila yawu. Yinki na yinza me salama na nge, Heini?”

<sup>33</sup> Ntwenya ya Hollandais yina me tuba “Oh, mfumu ya kisalu!” Yandi tubaka, “Nkembo na Nzambi, mu me vuuka!”

Yandi tubaka, “Nge me yinki?”

Yandi tubaka, “Mu me vuluka!” Yandi tubaka, “Mu kwendaka na Mpangi Troy awa na mwa lukutakanu mosi, mpe mu—mu me vuuka. Mpe Yesu me kota na kati ya ntima ya munu, mpe mu kele ya kifuluka mingi na zola!”

Yandi tubaka, “Ya fwana vwanda nge me kwenda na nkonga ya bilawu.”

<sup>34</sup> Yandi tubaka, “Yinga!” Yandi tubaka, “Nkembo na Nzambi!” Yandi tubaka, “Matondo na Nzambi samu na bilawu yina!” Yandi tubaka, “Nge zaba, kana nge baka tomabilu yina ke na kulumukaka bala-bala, mpe nge ke katula ba-ecrou nionso ya yawu, nge ke kuzwa kima ve kasi kikunku ya ‘bisengo!’”



35 Mbote, mu zaba ve kasi na yina ntwenya ya Hollandais yina vwandaka kaka na kutala na foti ve. Beno ke katula ba-ecrou nionso? Ba-ecrou kele yina ke simba yawu kintwadi. Mpe mu banza ti ya kele yina ke simbaka dibuundu kintwadi ntangu yankaka, ke simbaka sivilizasyo kintwadi.

36 Ntangu yayi, na kukatukaka na kutala Prescott, mwa bilumbu me luta, Mu vwanda tala ntoto ya kuyuma mpe mu vwanda tala mutindu na zulu ya Phoenix ba kele na Bansaba ya Japon, mpe ba vwandaka na bafololo kuna, bafololo ya kitoko. Kisika, ntangu mu vwandaka mwana ya bakala kuna, mu vwanda tambusaka bibulu bisika nionso yina. Bangombe, ya vwanda vwandaka na matiti ve, na yina ba vwanda zingaka kaka, na bambuma ya ba-cactus, mpe nionso yina.

37 Mpe na yina mu talaka ti ya vwandaka na kima ya kima na kusadila ntoto ya kuyuma. Mpe na ntoto ya kuyuma beto talaka, ba-cactus mpe bafololo. Mpe na yinzo ya munu kuna, to na yinzo yina beto ke na kufutaka; Mpangi ya kento Larson, mu banza ti yandi vwandaka awa na suka yayi, mu monaka yandi. Mpe yandi kele na kisika ya bafololo na ngaanda ya—ya yinzo; mwa ntoto. Nionso yina kele kuna kele zyelo, na yawu yandi vwandaka na mwa ntoto na kisika ya nene ya bafololo na konso lweka ya bayinzo zole. Mpe konso suka mu fwana basika mpe kutula maza na bafololo yina. Kana mu sala yawu maza ve, ya ke kufwa. Mpe ya ke . . . Mpe kuna, dyaka, mu fwana kuzwa pompa mpe kupompa yawu, samu na kukeba yawu na basidi; kana ve bitutu ke kudya yawu.

38 Mpe dyaka ntangu beno ke kwenda kaka fioti na manima ya yawu, bametele yivwa na yawu, ya kele na bafololo ke na kumenaka, mpe kuna na ntoto ya kuyuma ya ke na kumenaka. Mpe beno lendaka timuna bametele sambanu mpe ya ke vwanda mutindu poudriere; kima mosi ve na yinza kasi kaka ntoto, mpe ya kele na maza ve. Mpe nani ke pompaka yawu? Beno me mona?

Bayayi na kisika ya bafololo, kana beno kondwa kupompa yawu mpe kulosa yawu maza, banselele to bitutu, basidi, ke kudya yawu. Kasi basidi lenda simba ve yina kele kuna na ntoto ya kuyuma, mpe to dyaka ti ba fwana bondila yawu mpe kulosa yawu maza konso kilumbu; ya kele kima ya Mvangi. Yayi kele kuvukisa ya kima mosi na kima yankaka.

39 Mpe mu ke banza ti, bubu yayi, ya kele samu na yina Buklisto me kuma, samu na bantu, bulawu; ya kele samu ti beto kele na nkonga ya bambutukulu ya bima mpe ya Baklisto ya kieleka ve, nkonga yina ba fwana bondila mpe kulosa maza, mpe samu na kuvwanda na kati ya dibuundu.

40 Mu lenda banza Dibundu ya ntete, yina bawu vwandaka, mpe kufwanikisa yawu na bambutukulu ya bima yayi bubu yayi. Yayi ke vwanda mbutukulu ya ntalu ya fioti ya yina Dibundu ya kieleka ya ntete vwandaka, bakwikidi yina ya kukangama ya

Nzambi, na Mpeve-Santu. Beno ke bondila bawu ve. Beno zolaka bula bawu fioti ve na mukongo mpe kutuba na bawu ti beno ke nata bawu na yandi *yayi*; mpe kana bawu lemba yandi yayi, bawu kwenda na yankaka; mpe beno ke sala bawu diakre kana bawu kwiza awa mpe kubika yankaka yayi. Yina kele kuvukisa ya kima mosi na kima yankaka.

<sup>41</sup> Mu vwanda banza na kifikulu ya kieleka ya Michel-Ange, mu banza, ya “Madya ya Nsuka.” Mu banza ti yandi fikulaka yawu. Beno zaba yikwa kizizi yina ya kieleka ke lomba beno mbongo? Ya ke vwanda mafunda ya kulutula ya ba-dollar, ya ke lunga ata mbala mosi ve ntalu ya kifikulu ya kieleka, samu ti ya kele na zulu ya ntalu. Luvalu ya yawu kele zulu mingi! Kasi beno lenda sumba kima mosi na kima yankaka ya yawu na ntalu ya fioti na pene ba-dollar zole.

<sup>42</sup> Ya kele samu na yina bantu bubu yayi lenda bakula ve kukangama ya kieleka, ya bakwikidi ya kieleka. Bawu me kuma bilawu. Beno zaba, yinza ke kotaka na mumesanu bantangu yankaka na yina beno fwana kuzwa kilawu mosi samu na kusungika yawu nionso. Ya ke lomba muntu ke kota na kisalu yina kele fioti ya kuswaswana, mpe yandi kele kilawu samu na nsungi yina. Mu vwandaka banza kilumbu yankaka yina, nani kele na lenda?

Nani bubu yayi kele kilawu ve? Beno kele kilawu ya muntu mosi. Mu ke kwikila ti yinza ya muvimba ke na kuzimbisa mbanzulu. Beno zaba ti ya kele ntangu yina bantu lenda kufundisa ve na kati-kati ya mbote mpe yimbi, to ya kieleka to luvunu?

<sup>43</sup> Beno zaba bantu ya politiki lenda kufundisa ve mbote mpe yimbi? Beno me mona bawu kuvwanda swi na vote ya kuvutula Biblia na dibuundu to na . . . kuvutula Biblia na lukolo? Bawu zaba ve wapi nzila politiki ke fula. Beno banza na yawu! Mu zaba ve mutindu ya kele na Indiana ntangu yayi, kasi na mbanza ya Arizona ya kele kutelemina musiku na kutanga Biblia na lukolo. Mu banza ti ya kele kima mosi mutindu mosi na Indiana, na kutala États-Unis ya muvimba, samu ti kento mosi ya kukondwa lukwikilu sobaka ploglame ya muvimba. Mpe, beno bambuka moyo, ya kele kutelemina musiku na kutanga Biblia na balukolo ya beto ya leta, kasi bampaku ya bakwikidi ke simbidilaka ba longisa na lukolo kukondwa kukwikila.

<sup>44</sup> Polititiki. Beto kele na nsatu ya Abraham Lincoln yankaka. Beto kele na nsatu ya Patrick Henry yankaka. Beto kele na nsatu ya Americain yina lenda telama ata kisika bapolitiki kele, mpe kubokila mbote, “mbote,” mpe yimbi, “yimbi.”

<sup>45</sup> Beno zaba ti milongi bubu yayi lenda ve kufundisa yina kele mbote, Ndinga ya Nzambi to denomination? Ba zaba ve wapi nzila kubaka. Ba lenda ve kufundisa na kati-kati ya mbote mpe yimbi. “Mu zaba ti Biblia ke tubaka yawu, kasi dibuundu ya

beto ke tubaka . . .” Beno me mona, bantu kele ve na lenda ya kufundisa mbote na yimbi. Mpe nionso yina kele ya kuswaswana na Biblia kele luvunu. Ndinga ya Nzambi kele kieleka, mpe konso ndinga ya muntu kele luvunu, ya kele ya kuswaswana na Yawu. Mpe samu na kumeka na kutelama ntangu yayi na zulu ya ntangu mutindu yina, mpe samu na kutelama samu na yina kele mbote, beno ke kuma kilawu.

Beto tala mwa bantu.

<sup>46</sup> Mu lenda banza na profete Noé, na kilumbu yina ya nene yandi vwandaka zinga; na nsungi ya science yina ya nene kisika ba vwanda tunga ba-pyramide mpe ba-sphinx, kisika ba lendaka siamisa ti ya vwandaka ve na maza na mazulu, na nzila ya kusosa ya science. Awa me basika kiboba yayi kuna, mpe me tuba, “Ya kele na mvula ke katuka na mazulu.” Noé vwandaka kilawu samu na nsungi yina. Yandi kumaka kilawu.

<sup>47</sup> Beto banza na Moise. Moise, ntangu yandi kwendaka na Pharaon, mutindu beto zonzilaka na suka yayi, mpe Moise kwendaka na Pharaon, mpe yandi tubaka, “Mfumu me tinda munu samu na kubasisa bampika yayi,” na nkawa na diboko ya yandi, na ntwala ya basoda ya nene yina nungaka yinza ya movimba. Pharaon, na mayela ya yandi nionso ya science, banzaka ti Moise vwandaka kilawu. Mpe, yandi vwandaka kilawu, samu na bawu.

<sup>48</sup> Mu lenda banza na profete Elie, na kilumbu ya yandi ya nene, na ntangu ya nsungi ya mvwatu ya mbote; ntangu Achab mpe Jezabel vwandaka yala na yinza, mutindu ya vwandaka, na bilumbu ya bawu; mpe bamvwatu nionso mpe bima yina Jezabel vwandaka zola kulwata, mpe mutindu yandi kuzwaka bakento nionso kulwata mutindu yandi, mpe kupakula ya yandi, mpe nionso, bamvwatu ya yandi, mutindu yina yandi vwandaka lwata yandi mosi. Mpe ntangu kiboba mosi ya kilawu, mutindu Elie, kotaka na kimalu mpe samu na kutelemina yinsi ya movimba; samu na Achab, yandi vwandaka kilawu. Ya kele kieleka.

<sup>49</sup> Amos, profete, na ntangu yandi kwizaka na Samarie na kilumbu yina Samarie vwandaka mutindu Hollywood bubu yayi, bakento na bala-bala, ke lwata, mpe kusala mpe pité na meso ya bantu, mutindu nkadulu ya bawu vwandaka yimbi mpe vwandaka zinga kuna, na kubikaka bantu . . .

<sup>50</sup> Ya kele na kutula pité na ntwala ya bantu, bubu yayi, kaka na ntwala ya beno. Mu kwendaka kisika mosi nkokila yina, samu na kuzwa kima ya kudya, mpe bana ya babakala mpe bana ya bakento kuna vwandaka bumbasana mpe vwandaka pesana babize mutindu mu zaba ve yinki.

Mpe beno zaba, mpangi ya munu ya ntwenya ya kento, ti yina kele na kutala pité? Ntangu bakala ke pesa beno bize, yandi na kutala me sala pité na beno. Beno fwana bika yandi ve kupesa

beno bize tii beno ke kwelana, samu ti ba-glande, ya bakala mpe ya kento, kele na bikoba. Beno ke bakula? Mpe ntangu ba-glande ya bakala mpe ya kento ke vukana, ti ya vwanda kisika ya lendaka vwanda, beno na kutala me sala pité. Mpe beno fwana bika ve mwana ya bakala kupesa beno bize tii ntangu ba ke nangula vwale yina na kizizi ya beno mpe beno kele kento ya yandi. Beno sala yawu ve! Ya kele kusala pité. Ya kele kuvukisa ya ba-glande ya bakala mpe ya kento.

<sup>51</sup> Samu na yinki bakala ke pesa bize ve na bakala, kento kupesa bize na kento, na bikoba? Samu ti ya ke vukisaka ve ba-glande. Bana ke butukaka na kuvukisaka ba-glande.

Na yawu ya kele dyaka na kutala pité na ntuala ya bantu, bisika nionso. Beno tala na bitala-tala mpe nionso beno ke mona, kunyoguta mpe nkadulu ya yimbi. Kukondwa ntembe ti kukondwa nkadulu kele-kele na zulu! Wapi mutindu bawu lenda sala yawu, mpe kuvumbula bawu mosi bansatu na kupesaka babize na bakento yina na yinwa, na kuzabaka ti ya kele pité! Nzambi ke lemvokila yawu ve kaka kana beno balula ntima.

<sup>52</sup> Mpe ntangu yayi, na ntangu kwizaka, profete yayi ya nene, Amos. Yandi me zabana mutindu mosi ya baprofete ya fioti samu ti ya vwandaka ve na mingi ya kusonika na zulu ya yandi, kasi yandi vwandaka na Ndinga ya Mfumu. Mpe yandi talaka kuna na zulu ya mbanza yina, nionso ya kupesama. . . Na baparke, babakala vwandaka ya kuvwanda na maboko ya bawu na ziunga ya bakento, mpe bakento na maboko ya bawu na ziunga ya babakala, kaka Hollywood ya bilumbu yayi! Mpe yandi kwendaka kuna na mbanza yina, mpe tubaka, “Beno ke balula bantima to beno ke kufwa!” Yandi vwandaka kilawu. Yandi na kutala tubaka yandi mosi vwandaka kilawu, samu na bawu.

<sup>53</sup> Jean Baptiste, ntangu yandi kotaka na kusalu, samu na ba-denomination ya nsambulu ya kilumbu yina, yandi vwandaka kilawu. Yandi vwandaka na bweso na kukuma nganga-Nzambi, samu na kulanda makulu ya tata ya yandi. Kasi yandi mangaka na kusala yawu, samu ti Nzambi basisaka yandi na nganda ya ba-credo mpe ba-denomination yina, samu ti kusalu ya yandi vwandaka mfunu mingi. Yandi zolaka samuna nkwizulu ya Mesiya. Mpe na ntangu yandi vwandaka na kima ve ya kusala na ba-Pharisien, ba-Sadducéen, to nionso yina ya vwandaka, yandi mangaka kimvuka nionso ya bawu, mpe tubaka, “Beno banda ve na kutuba, ‘Beto kele na Abraham tata,’ samu ti mu ke tuba ti Nzambi kele na lenda na matadi yayi na kubasisa bana na Abraham.” Samu—samu na yinza ya nsambulu ya bilumbu ya yandi, yandi vwandaka kilawu. Kieleka.

<sup>54</sup> Ntangu Yesu kotaka na kusalu. Na bantu ya nsambulu ya bilumbu ya Yandi, Yandi vwandaka mpe kilawu. Samu, bawu

tubaka, “Nge kele Samaritain. Nge kele na nganda ya mabanza ya Nge. Nge kele kilawu,” na mutindu yankaka, “muntu ya kulawuka.” Yandi vwandaka yawu, samu na bantu, Mfumu mpe Mvulusi ya beno.

Kukondwa ntembe ti, Paul, longokaka na Gamaliel na kuvwanda nganga-Nzambi, na bweso kilumbu kukuma nganga-Nzambi ya ntete. Mpe na nzila ya yandi kuna na Damas, ba losaka yandi na ntoto na Nsemo mosi ya kimpeve. Mpe yandi talaka na zulu, yandi na kuvwandaka Zwife, mpe zabaka ti Dikunzi ya Tiya yina vwandaka yina twadisaka bantu ya yandi. Yandi tubaka, “Mfumu, Nani Nge kele?”

Mpe Yandi tubaka, “Mu kele Yesu.”

<sup>55</sup> Mpe ntangu yandi bikaka ndongosolo ya yandi, yandi bikaka théologie ya yandi nionso yina ba longisaka yandi na balukolo, mpe yandi kumaka mulongi ya bala-bala, ya ntangu nionso, yandi vwandaka kilawu. Yandi tubaka, “Mu me kuma kilawu.”

<sup>56</sup> Mpe bantu vwandaka banza ti yandi vwandaka kilawu, vwandaka zaba ve yandi mosi. Yandi tubaka na Festus, “Mu me lawuka ve.” Yandi zabaka kaka Mfumu. Kasi kuzaba Mfumu na kati ya nkonga ya misambidi. . .

Mu banza ti beno ke kondwa yawu ve. Kuzaba Yesu, bubu yayi, na kati ya nkonga ya misambidi, beno kele kilawu. Ya me sobaka ve. Mu lendaka kutandama na zulu ya yayi, kasi mu—mu zola sala nswalu samu na ndonga ya bisambu.

<sup>57</sup> Martin Luther, ntwenya ya nganga-Nzambi ya Allemagne yina, yina vwandaka nata kominyo kilumbu mosi, losaka yawu na zulu ya bimatinu, mpe tubaka, “Yayi kele ve nzutu ya Yesu Klisto. Yayi kele kaka dimpa yina ba me sala na manima kuna.” Mpe yandi tubaka, ti, “Muntu ya mbote ke zinga na nzila ya lukwikilu.” Yandi vwandaka kilawu, samu na dibuundu ya Katolika. Ba zolaka kufwa yandi samu na yawu, kasi, yandi vwandaka kilawu, mpe bawu bikaka kaka yandi swi. Kasi, yandi kumaka kilawu, samu na nsungi yina.

<sup>58</sup> John Wesley, na bilumbu ya ngunga ya nene ya busafu ya Angleterre. Na yina, kana reveil ya Wesley kotaka na kusalu ve. . . Yinza ya muvimba vwandaka ya kubeba, busafu bisika nionso. Mpe dibuundu ya ba-Anglican kwendaka ntama mingi tii ya vwandaka dyaka ve na reveil; na mutindu ya mbanzulu ya ba-Calviniste! Mpe John Wesley kotaka na kusalu, na Ndinga ya kusantisama, na kusukulaka busafu. Yandi kumaka kilawu.

<sup>59</sup> Na kutangaka Tata Wesley, mbala mosi, na buku ya yandi. Yandi vwandaka kulumuka mwa nzila, mpe mosi ya muntu ya dibuundu ya Angleterre. . . Bawu nionso banzaka ti yandi vwandaka kilawu, na yawu yandi telemaka na mwa nzila. Tata Wesley vwandaka muntu mosi ya fioti. Muntu yayi ya nene banzaka ti yandi ke bula kaka yandi, na yawu yandi telamaka

na mwa nzila. Tata Wesley belamaka mpe tubaka, “Lemvokila munu, tata, nge lenda katuka na nzila? Mu kele na mbangu.”

Mpe Anglican yina tubaka na yandi, “Mu ke katuka ve na nzila samu na kilawu.”

<sup>60</sup> Tata Wesley na buzitu nionso me kulumusa yimpu ya yandi, me luta na manima ya yandi; me tuba, “Mu ntangu nionso ke salaka.” Na yawu, beno me mona, yina vwandaka mosi yina vwandaka kilawu; mosi vwandaka samu na Klisto; yina yankaka vwandaka samu na dibuundu.

Na yawu, beno kele kilawu na muntu mosi, dyaka.

<sup>61</sup> Ntangu bantu ya Pentecote kotaka na kisalu, bamvula makumi tanu me luta, bawu tubaka, “Bantu yina kele bilawu!” Ba vwandaka bilawu, ya kele kieleka, samu ti bawu bedisaka kubodisa nionso yina vwandaka na kati ya bansungi ya dibuundu na ntangu yina ntangu bawu kotaka na kisalu.

Kasi yinki bantu ya Pentecote salaka? Vutukaka mbala mosi na kati ya biluki yina bawu basikaka, mbala mosi na kati ya kupola ya denomination. Beno zaba yinki? Ya me kuma ntangu samu na kilawu yankaka. Yinga. Ya me kuma ntangu samu na mosi yankaka. Ya kele kieleka.

<sup>62</sup> Beno tala, ecrou, ntete ya vwanda na ecrou, ya kele na boulon samu na kusimba yawu. Mpe ecrou yina kele ya kukanga na boulon yina; kana ya sala ve, ya kele ya kulunga ve. Beno tala. Bayina nionso vwandaka ya kukangama, na bilumbu ya—ya Noé, kangamaka na nsangu ya Nsangu ya mbote; Noe, ecrou, bendaka bawu na nzasa. Ya ke tadila yina kele kukangama ya beno, na yina beno kele ya kukangama. Kana beno kele ya kukangama na yinza, ba ke benda beno. Kana beno kele ya kukangama na Ndinga, Yawu ke benda beno. Ya ke tadila na zulu ya yina beno kele ya kukangama, wapi ecrou beno ke landa.

<sup>63</sup> Kasi Noé, na kuvwandaka kilawu ya Ndinga ya Nzambi, kilawu samu na nsungi ya science mpe samu na nsungi ya nsambulu na kati ya yina yandi vwandaka zinga, yandi bendaka bawu, bayina zolaka kuzwa mpulusu, na nzasa. Amen. Bayina ba soolaka ntete, boulon yina ba salaka na ntwala ya ecrou. Boulon fwana vwanda ya kukangama na ecrou.

<sup>64</sup> Na yawu, Satana, yandi kele na mwa ba-boulon mpe ba-ecrou, mpe, ba-boulon mpe ba-ecrou ya bimfumu ya yinza yayi.

Pharaon vwandaka kaka mpe kilawu samu na Noé, to na Moise, mutindu Moise vwandaka na Pharaon. Pharaon, na bima ya yandi nionso ya science, bendaka yinsi ya yandi na yandi mosi. Noé, na kuvwandaka kilawu ya Nzambi, bendaka dibuundu na yinsi ya nsilulu. Ya ke tadila na mutindu beno kele ya kukangama. Yandi basisaka dibuundu na Égypte; mutindu Noé basisaka dibuundu na yinza, na nzasa. Moise basisaka dibuundu na Égypte, na yinsi ya nsilulu ya Nzambi.

<sup>65</sup> Yesu tubaka. Ntangu yayi, beno sala keba, samu ti ba-ecrou yayi mpe ba-boulon yayi ke talana mingi mutindu mosi. Beno tala kaka mbote na kukanga. Matthieu 24:24, Yandi tubaka, “Ya ke vuna na kutala Misoolami ya kieleka.”

Ntangu yayi, ba-Américain mpe yinza ya muvimba ya denomination keke na nsatu ya kilawu mosi.

<sup>66</sup> ba-Methodiste, ba-Baptiste, ba-Presbyterien, bawu nionso keke ya kumwangana na kati ya *yayi, yina*, mpe bawu nionso keke na kunwanaka. Mpe, na manima ya nionso, bawu nionso keke ya kukangama na boulon mosi. Na yawu Nzambi me pesa bawu boulon, mpe me fidisa bawu ecrou, Lukutakanu ya Yinza ya Mabuundu. Ya ke vukisa bawu nionso kintwadi. Ya keke kieleka. Ya kieleka ya ke sala. Ya ke vukisa bawu kintwadi, Lukutakanu ya Yinza.

<sup>67</sup> Beno zaba, ya me kuma, awa ntama mingi ve. . . Ya lenda vwanda ve na kima yina ke salama, dyambu, kukondwa kikuma. Bakento ke zola kukatula bilele ya bawu. Bawu vwanda zola kulwata bakupe. Bawu vwanda zola dyaka kuvwanda ya dibuundu. Bawu vwanda zola kulwata ba-kinis nionso yayi, to nionso yina beno ke bokilaka bima yina. Bawu vwanda zola kusala yawu, mpe bawu vwanda zola dyaka kuvwanda ya dibuundu; bawu zola kuzonza na ngolo, kuboka, mpe kubina; kusambila, yina keke kusambila.

<sup>68</sup> Ntangu yayi, kana mu vwandaka na ntangu, mu zolaka siamisa yawu na beno. Ya keke lusambulu ya diabulu, kubina mutindu yina mpe kusala bima yina. Mu lenda siamisa yawu na beno, na bayinsi ya mimpani. Bawu zolaka kusambila, mpe kusimbidila kimbangi ya bawu mpe kuvwanda dyaka na dibuundu. Na yawu Nzambi me pesa bawu kilawu mosi, zole to tatu ya bawu; mosi na nkumbu ya Elvis Presley; mosi, Pat Boone, mpe Ernie Ford; bawu lenda kuyimba minkunga mpe nionso yankaka, mpe kufwanikisa na kuvwanda Muklisto. Ya keke ba-ecrou. Ya keke ve ya kukangama na Ndinga. Kieleka.

Ntangu yayi, mu tubaka ti mu ke manisa na kati ya ndambu ya ngunga, mpe ya me mana. Kasi, beno kuwa.

<sup>69</sup> Yinza keke na nsatu ya ecrou. Dyabulu me sala ti bawu kuzwa yawu. Bawu keke yimeni ya kukangama samu na yawu.

Kasi, na yina yinza keke na kukangamaka samu na ecrou, ya keke na bantu ba ke bokila Kento ya makwela. Yandi keke ya kukangama, mpe. Ya kieleka kaka mutindu mu me telama awa, Nzambi ke fidisa bawu ecrou yina ke basisa Kento ya makwela na kawo yayi, na kati ya Mvwandulu ya Nzambi. Ya keke vwanda ecrou ya kukangama na Ndinga.

<sup>70</sup> Mutongi mosi, mwa bilumbu fioti me luta, tubaka na munu, kuna na Tucson. Yandi tubaka, “Nge zaba, bantu yankaka

ke kumisaka nge kilawu, mpe bayankaka ke kumisaka nge nzambi.”

Mu tubaka, “Mbote, yina kele mutindu kima ya mbote.” Mu zabaka ti yandi vwandaka meka na kutonga munu. Beno me mona?

<sup>71</sup> Yandi tubaka, “Bantu ke banzaka ti nge kele nzambi.”

<sup>72</sup> Mu tubaka, “Mbote, kaka . . .” Mu zaba ti bantu salaka yawu ve. Kasi mu—mu zabaka ti yandi bakulaka yawu ve, samu ti yandi vwandaka na lweka yankaka ya kan, beno me mona. Na yawu mu zabaka ti yandi zabaka ve, yandi zabaka yawu ve. Na yawu mu tubaka, “Yina kele ntama mingi ve na Ndinga ya Nzambi. Mutindu yina ve?”

Beno me mona, kaka ti yandi—kaka ti yandi kuzaba ti beto vwandaka ya kuzimbana ve. Beto zaba kisika beto vwandaka ya kutelama. Beto zaba mutindu ya vwale beto vwandaka me tula, mpe mutindu ya mupepe vwandaka fula yawu. Beto zaba yina vwandaka kukangama ya beto, mpe yina vwandaka ecrou ya beto. Mpe beto zaba mutindu beto me telama.

Mu tubaka, “Ya kele ya kuswaswana mingi ve, na Ndinga ya Nzambi. Mutindu yina ve?” Mu tubaka, “Bambuka moyo, ntangu Nzambi tindaka Moise kuna na bana ya Israel, Nzambi salaka Moise nzambi, ya kele kieleka; mpe salaka, mpe, Aaron mpangi ya yandi, profete. Ya kele kieleka. ‘Baprofete nionso,’ Yesu tubaka, ‘vwandaka banzambi.’ Bawu vwandaka banzambi; bantu.” Ya kele kieleka. Nzambi zola kutuba yawu mutindu yina.

<sup>73</sup> Beno kuwa, Ndinga yina beto ke longaka mpe bampova yina mu me tuba na suka yayi, “Nzambi yina ke bumbamaka na manima ya bampusu, bampusu ya ba-blaireau, Nzambi yina ke bumbamaka na manima ya mpusu ya muntu.” Beno me mona? Ya kele yina Yandi salaka. Ntangu Nzambi talisamaka na yinza, Yandi vwandaka ya kubumbama na manima ya vwale mosi, na manima ya mpusu ya Muntu yina ba bokilaka Yesu. Yandi vwandaka ya kufuka mpe ya kubumbama na manima ya mpusu ya muntu yina ba bokilaka Moise, mpe bawu vwandaka banzambi, Banzambi ve; kasi bawu vwandaka Nzambi, Nzambi mosi, yina sobaka kaka kibukutu ya Yandi, na kusalaka kima mosi konso ntangu, na kunataka Ndinga yayi. Beno me mona, Nzambi salaka yawu mutindu yina. Yandi zabaka ti muntu fwana mona kima mosi; ya kele na mosi na mosi ya beto yina me butuka na yinza.

<sup>74</sup> Mutindu mu vwandaka tuba na beno na suka yayi, muntu ve vwandaka lenda kulanda Moise na kati kuna. Nzambi ata mbala mosi ve me salaka na bantu zole. Yandi ke salaka na muntu mosi, ntangu nionso. Muntu mosi ve zolaka sala bilanda-landa na Moise. Ya vwandaka lufwa, lufwa ya yinza, samu na kumeka na kusala bilanda-landa na yandi, samu na kukota na Dikunzi ya



Tiya yina na yandi. Na yawu bantu nionso me salama ve. . . Beno me butuka ve na mutindu yina, samu na kukota na kimpeve yina.

Kasi Nzambi tulaka bayankaka na zulu ya ntoto samu na kutalisa Yandi, mutindu mwala ya Yandi. Mpe mwala yina kele ya kukubika, na Nzambi, na kukota na kimpeve ya nene yina ya kuzabana ve, mpe kumona, mpe kubasisa bima yina mabanza ya kimuntu lenda zaba yawu ve. Ya ke basisa dinsweki ya Nzambi, ke tuba na ntwala bima yina kele, mpe bima yina kele, mpe bima yina ke vwanda. Yinki ya kele? Nzambi, Nzambi na manima ya bampusu, mpusu ya muntu. Ya kele kaka kieleka.

<sup>75</sup> Sam Connelly yina ke zingaka na Tucson. Yandi kwizaka awa mbala mosi, bamvula mingi me luta, na Tata Kidd, mpe yandi belukaka; na ulcere yina vwandaka bamvula mingi. Ntangu mu kwendaka kuna na automne me luta, Sam vwandaka na ditadi yina muntu ya mayela mingi kuna, na—na Tucson, talaka yawu. Ya vwandaka nene mutindu biiye. Mpangi Sam Connelly. . .Mingi na kati ya beno awa zaba yandi; yandi kele ya Ohio. Mpe yandi kwendaka na dokotolo, mpe yandi tubaka, “Sam, kubama samu na sabala ke na kwiza; mu ke katula ditadi yina,” mwa bilumbu katuka kuna.

Yandi tubaka, “Ya lenda basika yawu mosi, dokotolo?”

Yandi tubaka, “Ya lenda salama ve. Ditadi kele nene mingi.”

<sup>76</sup> Na yawu yandi kotisaka yandi na tomabilu mpe nataka yandi na yinzo. Mpe yandi bokilaka; yandi tubaka, “Mu zola ti nge kwiza sambila samu na munu, Mpangi Branham.” Samu na yinki yandi bokilaka munu samu na dyambu ya mutindu yina? Mpe mu bandaka na kusambila samu na yandi.

<sup>77</sup> Mu tubaka, “Sam, ya kele MUTINDU ME TUBA MFUMU, ditadi ke basika yawu mosi.”

<sup>78</sup> Mpe na suka yina landaka yandi nataka ditadi yango na dokotolo. Mpe yandi tubaka, dokotolo tubaka, “Tata Connelly, mu ke na kubakula ve mutindu ya me salama.”

<sup>79</sup> Mpe yandi tubaka, “Mu ke kwikilaka na Nzambi, mpe Nzambi me basisa ditadi samu na munu, me katula yawu na munu.” Muntu yina vwandaka kwikila yawu na mpasi, dokotolo. Kaka mutindu yandi vwandaka kwikila ve ti kuvimba ya nene yina bikaka kento ya munu. Beno me zaba yawu, beno me mona. Na yawu yandi tubaka. . .

<sup>80</sup> Pene ya bangonda sambanu na ntwala, yina vwandaka pene ya tatu. . .pene ya basabala zole me luta, to basabala tatu me luta, Sam Connelly kuzwaka mpasi mosi ya ntima ya kusakana ve. Mpe mu zaba nkumbu ve, infractus, to mutindu mosi ya kukangama ya ntima, to nionso yina ya kele. Ya kele kima ya boma mingi. . .Ya lenda ve. . .Beno lenda beluka na yawu ve, ba ke tubaka. Kukangama ya ntima, mpe ntima ya yandi kukangamaka. Mpe binama ya yandi kuvimbaka mingi tii

binsongini ya yandi vwandaka nene mingi kulutila makulu ya yandi, tii na zulu awa na luketo ya yandi. Na yawu ba nataka yandi na dokotolo. Dokotolo tubaka, “Beno nata yandi na yinzo, na malembe nionso, to na lupitalu.”

Sam tubaka, “Mu zola kukwenda na lupitalu ve!”

Yandi tubaka, “Beno nata yandi na yinzo mpe beno tula yandi na mbeto, mpe nge ningisa ve yintu, maboko, to makulu, bangonda sambanu.” Yandi tubaka, “Nge lenda kufwa na konso muniti.”

<sup>81</sup> Mpe Mpangi Norman bokilaka. Mpe beto kwendaka kuna na nkokila yina, samu na kumona Mpangi Sam. Mpe ntangu beto sambilaka samu na yandi, mpe Mfumu zonzaka.

Mpe na suka yina landaka, Sam kwendaka na bureau ya dokotolo, me futika makulu ya pantalo ya yandi, telemaka na ntwala ya dokotolo, mpe tubaka, “Tala munu, dokotolo!”

Mpe dokotolo tulaka yandi na yisi ya electrocardiogramme, mpe yandi tubaka, “Mu ke bakula yawu ve.” Yandi tubaka, “Vutuka na kusalu.” Yandi tubaka, “Nge kele ya wapi dibuundu?”

Yandi tubaka, “Mu kele ya ata mosi ya bawu.”

<sup>82</sup> Yandi tubaka “Nge lenda vwanda ve Muklisto kukondwa kuvwanda ya ba-denomination yina. Nge fwana vwanda.” Beno me mona, ya kele nionso yina dokotolo zabaka. Sam vwandaka kilawu, samu na yandi. Mpe yandi vwandaka kilawu, samu na Sam, na kulombaka kyuvu ya mutindu yina.

Na manima yinki salamaka? Sam kwizaka, mpe yandi tubaka, “Yinki mu lenda tuba na muntu nionso yina ke tuba na munu mambu ya mutindu yina, Mpangi Branham?”

<sup>83</sup> “Tuba na bawu ti nge ‘kele ya Dibuundu mosi mpe ya mosi kaka.’ Beno ke kumaka ya Yawu ve. Ya kele denomination ve. Beno kele ya kubutama na kati ya Yawu.”

<sup>84</sup> Ntwenya mosi ya mama, pene ya bangonda sambanu me luta, kuyekamaka na ntulu ya Mpangi ya kento Norman. Mu me zimbana nkumbu ya yandi, ntwenya mosi ya kento ya kitoko mingi na kutala ya bamvula makumi tatu. Yandi na bakala ya yandi kukabukaka, mpe yandi kuzwaka leucemie. Mpe yandi kumaka na kondisyo mosi ti yandi zolaka tambula na mpasi. Mpe na nsuka ya kumaka mpasi mingi tii badokotolo tulaka yandi na mbeto. Mpe badokotolo vwanda kwiza tala yandi tii ntangu ya yandi ke kuma. Ba pesaka yandi tii Kilumbu ya tatu yina vwandaka landa. Yandi zola kufwa na Kilumbu ya tatu. Mpe Mama Norman na mutindu nionso basisaka yandi na mbeto, mpe nataka yandi, mpe zolaka simba yandi na kiti. Mpe na yina ntwenya ya mama vwandaka kuna, vwandaka kukizukisa na ntwala mpe na manima, mpe mpembe mutindu yandi zolaka vwanda; zioni na mpusu, samu na cancer, leucemie.

Mu tubaka, “Mbote, mu lenda sambila samu na nge, mpangi ya kento.”

Mpe yandi vwanda meka na kuzonza, mpe maza ya meso na meso ya yandi, yandi tubaka . . .

Mu—mu tubaka, “Nge kele Muklisto?”

Yandi tubaka, “Mu kele Methodiste.”

Mu tubaka, “Mu—mu me yufula nge kana nge vwandaka Muklisto.”

Mpe yandi tubaka, “Nge zola tuba kana mu kele ya dibuundu ya Klisto?”

<sup>85</sup> Mu tubaka, “Ve, mama. Mu zola tuba, nge me butuka na Mpeve ya Nzambi, mpe zola Mfumu Yesu?”

Yandi tubaka, “Mbote, mu ke vwandaka ntangu nionso ya dibuundu.”

<sup>86</sup> Mu tubaka, “Kana Nzambi bika ti nge kuzinga, nge ke sila munu ti nge ke vutuka na munu mpe ke bika mu lakisa nge nzila ya Mfumu kulutila pwelele?”

Yandi tubaka, “Mu ke sila na Nzambi kima nionso, kana Yandi keba luzingu ya munu. Mu ke sadila Yandi.”

<sup>87</sup> Kaka kuna vision me kwiza, mu tubaka, “**MUTINDU ME TUBA MFUMU**. Kukubama ve; pasula bima ya nge ya lufwa ya nge, kilumbu na manima ya mbasi.” Yina vwandaka na Kilumbu ya ntete, mpe yandi zolaka kufwa na Kilumbu ya tatu. “Nge ke kufwa ve.”

Lumingu me luta, Sabala mosi me lunga, mu vwandaka na yandi na bureau. Yandi me bwela bakilo kumi na tanu; dokotolo me tuba ya kele ve na kidimbu mosi ya leucemie yina lendaka talana kisika mosi. Mpe yandi vwanda zola kuzaba; mpe mu fidisaka yandi kuna na kuzwa mbotika na Nkumbu ya Yesu Klisto, na kati ya dibulu ke lutisaka maza, na mutindu ya Mfumu. Ya lendaka vwanda bulawu, kasi, “Kana Mu vwanda ya kuzangula, Mu ke benda bantu nionso na Munu.”

<sup>88</sup> Mu kwendaka tala, mwana ya bakala yina vwanda bakaka na ba-bande awa, Leo Mercier. Yandi kele na parke ya bayinzo ya matoma. Mpe mu sambilaka samu na bantu mosi. Mpe mu sambilaka samu na ntwenya mosi ya mama na nkumbu ya Lokar, mu banza ya vwandaka. Mpe yandi kuzwaka balipaso kumi na yiya samu na cancer, mpe badokotolo bedisaka yandi na lufwa. Mpe ba sambilaka samu na yandi, mpe tubaka na yandi ti yandi ke kufwa ve, kasi yandi ke zinga. Mpe kele na kidimbu ya yawu ve kisika mosi kuna. Mpe samu na yina, makumi zole na nana ya dibuta ya yandi yina vwandaka kuna, kuvuukaka mpe kufulukaka na Mpeve-Santu. Ya lendaka vwanda bulawu, kasi ya ke na kubendaka bantu nionso na Yandi, bayina zola kukwiza.

Ya kele ya kukangama na Ndinga. Beno me mona yina mu zola kutuba?

<sup>89</sup> Mu kele na mukanda yina me kwiza, kilumbu na manima ya mazono, ya kele kaka kuna na manima na badosye. Automne me luta, na yina mu vwandaka na zyetolo ya kuzomba. . . to, na printemps me luta, ya vwandaka mvula me luta. Mwana ya bakala ya Indien na nkumbu Oscar, na yina beto ke zombaka na banzila na zulu kuna; ya kele kisika Wanzio ya Mfumu, mu tubaka na beno, awa, zolaka nata caribou yina mpe—mpe ulusu grizzli ya ntinta ya mbongo ya kisengo. Beno nionso ke bambuka moyo na yawu. Na yina mwana ya bakala yina, ntangu mu kotaka na . . . Yandi kotaka na tenta, printemps me luta. Mpe na yina Bud lombaka munu na kulomba lusakumunu, (yandi katulaka ba-gant ya yandi; yandi vwandaka nata bapunda), yandi lwataka ba-gant yango mpe vwandaka ya kukubama na kubasika. Yandi vwandaka muntu ya Katolika. Yandi vwandaka na kima ve ya kusala na Yawu.

<sup>90</sup> Automne me luta, ntangu yandi lendaka, yandi vwandaka na lweka ya munu. . . Ntangu mama ya yandi vwandaka kuna na manima, vwanda kufwa na ntima kangamaka, yandi tubaka, “Nge lenda vutuka ve samu na kusambila samu na yandi?” Mu vutukaka na mwa yinzo yayi ya ba-Indien kuna. Mpe kuna, bawu nionso vukanaka pene-pene ya mama yayi, mpe yandi vwanda kufwa, yandi vwanda lenda ve kuzonza mpova mosi ya Kinglelesi. Mpe Mpeve-Santu kulumukaka mpe tubaka na mama, na nzila ya mutendudi, mwana ya yandi ya kento, yina salamaka, yina ya vwandaka. Mpe bokilaka nkumbu ya yandi, mpe tubaka na yandi yina yandi vwandaka, mpe ya wapi dikanda yandi katukaka, mpe wapi mutindu ti yayi ke salama. Mpe mama na mbala mosi belukaka.

<sup>91</sup> Mpe na suka yina landaka ntangu mu vutukaka na kukwenda mona bawu, na yina mu tambulaka na zulu ya mpunda, na kukwendaka bakilometele makumi sambanu samu na dimeme mosi, kuna bawu nionso vwandaka ya kuvwanda kuna, yandi vwandaka nionso. . . vwandaka mata na zulu ya mpunda samu na kuvutuka na kwenda yumisa ngombe ya ntete. Mpe mu tubaka, “Mazono na nkokila ntangu mu sambilaka, mu tubaka, “Tata ya beto Yina kele na Mazulu.” Mu tubaka, “Louise, mu—mu. . . Ya vwandaka kisambu ya Katolika. Beno nionso yambaka, mpe na manima, ya kieleka, mu bikaka beno.” Mpe mu tubaka, “Ntangu yayi mu ke tonda kaka Nzambi. Beto ke tubaka ve bisambu; beto ke sambilaka.”

<sup>92</sup> Yandi tubaka, “Beto kele dyaka bantu ya Katolika ve.” Yandi tubaka, “Beto ke kwikila mutindu nge ke kwikila. Beto zola nge baka beto nionso mpe kubotika beto mutindu nge ke botikaka. Beto zola Mpeve-Santu.”

<sup>93</sup> Na kuvutuka ya nzyetolo...Mwana ya bakala yina zimbisaka bampunda ya yandi, bangonda na ntwala ya yawu, vwanda lenda kuzwa yawu ve. Mpe ntwadisi vwanda semba yandi na ngolo, na kutubaka, "Oscar, nge zaba mbote ti nge zolaka bika bampunda yina mutindu yina ve. ba-ulusu, ba-grizzli mingi, fwana kudya bawu bampunda na ngunga yayi."

Mpe yandi landilaka na kuvwanda pene-pene ya munu. Mpe yandi tubaka, nkokila mosi, yandi tubaka, "Mu lomba nge kima mosi?"

Mu tubaka "Yinga."

Yandi tubaka, "Mpangi Branham, sambila Nzambi. Ti Nzambi vutula munu ba-poney ya munu."

Mu tubaka, "Bud tubaka ti ulusu me kudya bawu."

Yandi tubaka, "Mpangi Branham, lomba na Nzambi. Ti Nzambi vutula Oscar ba-poney ya yandi."

Mu tubaka, "Nge ke kwikila yawu, Oscar?"

Yandi tubaka, "Mu ke kwikila. Nzambi belusaka mama ya munu. Nzambi tubaka na nge kisika ulusu vwandaka, kisika mbisi vwandaka. Nzambi yina, zaba kisika mbisi kele, zaba kisika bampunda ya munu kele." Beno me mona?

<sup>94</sup> Mvula mosi me luta, na yina mu vwandaka kuna na Fred Sothmann, yina kele awa na nkokila yayi, Billy Paul, mwana ya munu ya bakala. Mpeve-Santu kulumukaka. Mu tubaka, "Oscar, nge ke tala ba-poney ya nge. Ba ke vwanda ya kutelama na mvula ya mpembe."

Kuna kele na mukanda, yina ba me sonika sabala me luta, ya me kwiza, mpe mu me kuzwa yawu na Kilumbu ya tanu. Ya kele kaka kuna na kati ya badosye na ntangu yayi. "Mpangi Branham, Oscar me tala ba-poney ya kutelama na mvula ya mpembe."

<sup>95</sup> Wapi mutindu bawu me zingila, muntu ve zaba. Kuna, mwana ya bakala yina . . . Na ntangu yayi ya mvula, na Ngonda ya sambanu, ya kele na mvula mingi ya mpembe ya ke vwanda dyaka tii bametele sambanu to yivwa na ziunga ya bawu. Wapi mutindu bawu vwandaka kuna hiver nionso, na kati ya canyon yayi? Oscar lendaka kukuma na bawu, na mapapa ya mvula ya mpembe, kasi, ya kieleka, yandi lenda lwatisa ve mapapa ya mvula ya mpembe na ba-poney ya yandi. Kasi yandi talaka bawu, landila Ndinga ya Mfumu. Ya lendaka wakana mutindu bulawu; beno kwikila kaka yawu mbala mosi! Ya me tadila na mutindu ya beno ya kukangama.

<sup>96</sup> Ntangu yayi, ya ke kangama ve na denomination. Ya ke kangama kaka na Ndinga. Kasi ya kele na bantu na yinza ke kwikilaka Ndinga yango! Ya ke lomba kilawu samu na kukanga na kubasisa Kento yina ya makwela awa, ya kukangama, samu ti Kento ya makwela na Bakala ya makwela kele muntu mosi.

Mpe Nzambi kele mosi, mpe Ndinga kele Nzambi! Ya fwana vwanda ya kukangama na Ndinga, mpe Yawu ke basisa Kento ya makwela na ba-denomination yayi.

<sup>97</sup> Yinga, yandi vwanda zola kutonga munu. Beno zaba, ya ke bambusa munu moyo na yina mu vwanda zonza, na suka yayi, Nzambi yina ke bumbamaka na manima ya bampusu, mpusu ya muntu.

<sup>98</sup> Mwa disolo ya fioti, mpe na manima mu ke sukisa; beno lemvočila munu samu mu me baka beno awa pene ya baminuti makumi yiya na tanu ntangu yayi. Ya vwanaka na yinzo mosi, yinzo ya Baklisto, mpe ya vwanaka. . . Mu tubaka yayi na mutongi yayi. Mpe na yinzo yayi ya vwanaka. . . Ba vwanda kwikila na Nzambi. Ba vwanaka na mwana mosi ya bakala kuna, kasi yandi vwanaka na boma ya lufwa na kitembo. Nzasi, oh, yandi vwanaka na boma ya lufwa. Yandi zolaka kima mosi na yisi ya bamesa, kisika nionso, ntangu nzasi zolaka lezima.

Na yawu nkokila mosi kitembo ya nene kwizaka na ferme, mpe kisika ba vwanaka zinga, mpe mupepe vwanda fula na bayinti, mpe banzasi vwanda lezima, ngunga vwanda kuma ntama mingi na mpimpa. Mama tubaka na Junior, yandi tubaka, “Ntangu yayi, Junior, mata na zulu mpe kwenda kulala.” Yandi tubaka, “Ntangu yayi, kuvwanda na boma ve. Mata kuna.”

<sup>99</sup> Na yawu mwana Junior, na pyjama ya yandi, mataka bimatinu, na kutalaka na manima, fioti zola dila. Yandi me lala, me meka na kulala, me fuka yintu ya yandi. Yandi vwanda lenda ve kulala; banzasi yina vwanaka lezima na nela. Na yawu yandi tubaka, “Oh, mama,” yandi tubaka, “mata awa mpe kwiza lala na munu.”

Mbote, yandi tubaka, “Junior, kima mosi ve ke kwamisa nge. Nzasi yina lenda talisa nge mpasi ve.”

Yandi tubaka, “Kasi, mama, mata awa mpe kwiza lala na munu.”

<sup>100</sup> Na yawu mama mataka bimatinu mpe lalaka na mbeto, pene-pene ya junior ya yandi. Mpe yandi tubaka, “Junior, mwana ya munu ya bakala, mama zola kutuba na nge kima mosi.” Yandi tubaka, “Junior, beto kele dibuta ya Baklisto. Beto ke kwikilaka na Nzambi, mpe beto ke kwikilaka ti Nzambi ke kebaka beto na bitembo. Beto ke kwikila yawu. Mpe beto ke kwikila ti Nzambi ke kebaka na baya ya Yandi.” Mpe yandi tubaka, “Mu zola ti nge kwikila yawu, Junior. Tala, kuvwanda na boma ve. Nzambi kele na beto, mpe Yandi ke keba beto.”

<sup>101</sup> Junior me dila mwa bantangu fioti. Yandi tubaka, “Mama, mu ke kwikila yawu, mpe.” Yandi tubaka, “Kasi na ntangu nzasi yina kele pene-pene mingi na nela, mu zola kutala Nzambi yina kele na mpusu na zulu ya Yawu.”

Na yawu mu banza ti mingi ya beto bakuluntu ke banzaka kima mutindu mosi. Nzambi, na mpusu na zulu ya Yawu! [Kisika ya mpamba na bande—Mu.] Nzambi, na mpusu na zulu ya Yawu! Ya lendaka wakana mutindu bulawu, samu na yinza, kasi ya ke na kubenda bantu nionso na Yandi.

Beto sambila.

<sup>102</sup> Tata ya Mazulu, mutindu mwa masolo ya—ya bimbangi, mpe bantangu yankaka ya ke salamaka samu na kikuma mosi. Mpe ya kele, ata mutindu ngolo ya kele, kasi beto ke bakula yawu na ndinga yina ya kele. Na yawu beto ke tonda Nge, na nkokila yayi, Mfumu, ti—ti Nzambi lenda vwanda Yandi mosi na kati ya beto. Beto ke vutula matondo ti ya vwandaka na munkayulu yina ba salaka, Menga ya Muntu ya kudedama, Yesu; Yina vwandaka muvimba ya Nzambi, muvimba ya Bunzambi na kati ya nzutu, ti Yandi pesaka luzingu ya Yandi ya ntalu; ba bakaka yawu na Yandi ve, kasi na luzolo nionso pesaka yawu, ti beto lendaka sepela na Yandi na muvimba ya Mvwandulu ya Yandi, na kati ya nkembo ya Shekinah na kati ya yina Yandi zingaka; ti moyo ya beto lenda vwanda ya kusantisa na Menga yina, ti Mpeve-Santu ya nene Yawu mosi lenda zinga na kati ya beto. Mpe beto ke kuma milongi, baprofete, mpe nionso yina, samu na bantu, na bayina, Mfumu, bayina kele na nsatu; makabu ya Nzambi; Nzambi Yandi mosi na kumonisamaka, ke kyenzula makabu ya nene ya Nzambi, na ntwala ya nsungi yayi ya bilumbu yayi.

<sup>103</sup> Mpe nzonzolo ya ngolo, Mfumu, na kuvwanda kilawu. Mpe beto zaba, ti na kilumbu yayi, ti ya ke lomba ntangu yankaka na yina yinza ke kuma na mumesanu mutindu dibuundu kele bubu yayi, na kukumaka kaka ya mabuundu ya malu-malu mpe ya badenomination ya malu-malu. Muntu yina ke kwiza na Ndinga ke monana kilawu mosi, muntu ya kulawuka. Mutindu ntumwa ya nene Paul, yina ba longisaka na kuvwanda théologien, nganga-Nzambi, mpe kasi yandi tubaka ti yandi kumaka kilawu, samu na nkembo ya Nzambi. Yandi bikaka ndongosolo ya yandi, ti bantu lendaka...kuwa bampova ya yandi ya kubongisa kitoko. Mpe yandi tubaka ti yandi kwizaka ve na bampova ya kitoko mpe ya ndwenga ya muntu, ti lukwikilu ya bawu ke vwanda mutindu yina. Mutindu dibuundu me baluka na yawu bubu yayi, mutindu yandi pesaka profesi, “Na manima ya nkwedolo ya munu, ba-loup ke kota, ba ke bika ve mameme.” Kasi yandi tubaka ti yandi kwizaka na bawu, “na ngolo mpe kumonisama ya Mpeve-Santu,” ti lukwikilu ya bawu ke vwanda na Nzambi. Tata, yandi kumaka kilawu, samu na yinza, samu na kuzaba Yesu.

<sup>104</sup> Mpe mutindu mosi beto bubu yayi, Mfumu. Ya kele na bantu ya kuvwanda awa yina ke talana bilawu, samu ti bawu kele ya kukubama na kusala kivuvu na Nzambi samu na kubeluka ya bawu, samu na kisika ya bawu ya nsuka ya Seko. Ba ke na kutula kuzabana ya bawu na kuteza, samu na kusambila Yandi.

Na kutonda Yandi, na kukumisa Yandi, na kupesaka kimpwanza na mpeve ya bawu, samu na kusambila Nzambi; ba ke talana bilawu. Kasi Nge tubaka, ti, “Bulawu ya Nzambi,” kana beto kele bilawu, “vwandaka ngolo mpe ndwenga kulutila ndwenga ya muntu; samu ti muntu, na ndwenga, zabaka Nzambi ve. Kasi na nzila ya bulawu ya kulonga, ya sepelisaka Nzambi na kuvulusa bawu bayina vwandaka samu na kuvuuka.” Beto ke sambila, Nzambi, ti Musoniki ya nene ya Ndinga yayi kukwiza na nkokila yayi mpe belusa bambevo, kuvulusa bayina me zimbana. Beto me lomba yawu na Nkumbu ya Yesu. Amen.

<sup>105</sup> Mu ke sala kufwanikisa na Nzambi, samu ti beno kota na poto-poto ve na yina mu me tuba bubu yayi; Nzambi kele Diama ya nene, ya Seko.

Mpe ntangu ba ke basikaka diama na matadi ya bleu ya Afrika, Mu me vwandaka na kati ya ba-mine mpe me monaka bawu na kati ya nene. . . mutindu ba ke salaka yayi mpe ke basisaka badiama, mutindu ba ke lutisaka yawu na kinikunu, mpe tiya ya nene ya bleu ya badiama, badiama ya ndombe ke basika. Ya kele na mutindu ve, mutindu mosi. Ya kele kaka ditadi mosi ya nene. Mpe, ya kieleka, ya kele na tiya ve na kati ya bawu na ntangu yina. Ya kele kaka diama, ditadi; ya ronde, ya kulengula, mingi ya yawu. Kasi diama yayi ba fwana zenga yawu. Ntangu yayi, ya kele kutelemina musiku na kuvwanda na mosi yina ba me zenga ve. Ba fwana zenga yawu, mpe dyaka beno fwana kuzwa mukanda ya kisika yina beno sumbaka yawu, samu ya kele na mafuku ya ba-dollar na kati ya bawu.

Mpe mu ke fwanikisa Nzambi na diama yina.

<sup>106</sup> Ntangu yayi, ba ke zengaka diama samu ti ya lakisa yina kele na kati ya yawu, tiya yina kele na kati ya diama. Mpe ya fwana vwanda ya kuzenga na mutindu nionso ya fioti, na konso nsongi ya fioti, na bansongi tatu. Beno tula bansongi tatu na diama, mpe nsemo na zulu ya kima mosi ya bansongi tatu ke basisa bantinta sambwadi, beno me mona, ya ke sala bantinta sambwadi.

<sup>107</sup> Mpe ntangu yayi beno tala, “Nzambi lwalaka samu na masumu ya beto, kubukanaka samu na masumu ya beto ya nko.” Beno me mona, ba zengaka Yandi, ba bukaka, Diama yina ya nene, ti na Yandi lendaka lakisa makabu na Dibuundu.

Mpe ya kele nsemo ve; samu ti, nsemo fwana vutuka manima, na ntangu mwini me katukila yawu, na kisika ba zengaka yawu.

Kasi konso kitini ya fioti yina ke katuka na kitini yina kele ve ya kubebisa; ba ke sadila yawu. Ba ke salaka bantunga ya Victrola na mingi ya yawu. Mpe bantanga yina, ya kele bitini ya diama, ya kele yina ke basisaka miziki yina ba bakaka na diske.

<sup>108</sup> Mpe mu banza ti beno ke mona yina mu zola kutuba. Kitini ke katuka na Klisto, dikabu ke katuka na Klisto, me tulama na zulu ya Biblia, ya ke samuna mansweki ya kubumbama ya



Nzambi na mukwikidi. Yandi zaba dinsweki ya ntima. Yandi zaba konso muntu. Nge ke kwikila yawu?

Ya ke vwanda ve diama ke tuba, “Beno me mona yina mu kele?” Ya kele kisika yandi me katuka. Diama kele diama samu ti yandi me katuka na diama.

<sup>109</sup> Mpe ya kele mutindu makabu ya Mpeve kele, . . . samu na muntu, ya kele kitini ya Diama yina. Ba me fidisa yawu, mpe ba me kulumuna, mpe me kotisa na dikabu, samu na kutendula, samu na kulonga, samu na kulongisa. Ya kele na makabu tanu ya kimpeve; bantumwa, baprofete, milongisi, ba-pasteur, ba-evangéliste, mpe bawu nionso kele samu na kukulisa Nzutu ya Klisto. Mpe kaka mutindu ya kele na milongisi, ba-pasteur, ya fwana vwanda na baprofete. Beto zaba yawu.

<sup>110</sup> Mpe beto ke kwikila ti Nzambi fwana kumonisama na kilumbu ya nsuka, na kati ya bantu ya Yandi, na Nkuna ba soolaka, landila Biblia, na mutindu ya profete. Ya kele kieleka na Ndinga. Ve ti muntu kele Nzambi, kasi ti dikabu kele Nzambi. Beno me mona? Mpe yawu yina ntumbu.

Ntangu yayi, pengele ke bula ve mbote yina ba bakaka. Ntunga ya kutunga ya ntangu nionso lenda bula yawu mbote ve. Kasi diama, kele kulutila mbote. Ya ke basisaka yawu mbote-mbote, nsongi ya ntunga ya diama.

<sup>111</sup> Bika ti Nzambi, na nkokila yayi. . . Ti diske ya beno ya luzingu, nionso yina kele yimbi na beno, nionso yina beno ke zola kuzwa na Nzambi, ti Mfumu ya nene Yina ke simbaka ntunga na diboko ya Yandi, ti Yandi tula yawu na zulu ya luzingu ya beno mpe kutalisa na beto samu na yina beno kele awa, yina beno zola; na yina beto ke zaba ti Yandi kele awa.

<sup>112</sup> Tata ya Mazulu, Nge lenda pesa yawu ntete mu banda ndonga yayi ya bisambu, mu zola sala yayi ve, kasi Nge lenda sala yawu, ti bantu lendaka zaba. Ya lendaka vwanda na banzenza awa bayina ya kusambila. Mu zaba bawu ve, kasi Nge zaba bawu. Mpe Paul tubaka, “Kana beno zonga na bandinga, mpe ti ya vwanda ve na lutendulu to kupesa malongi ve, bantu ke tuba ti beno kele bilawu. Kasi kana muntu pesa profesi mpe talisa yina kele na ntima, kuna bawu ke tuba, “Ya kieleka Nzambi kele na beno.” Bika ya vwanda dyaka, Nzambi, na ngunga me luta yayi. Nge silaka yawu, mpe ya ke vwanda mutindu yina. Na Nkumbu ya Yesu Klisto. Amen.

<sup>113</sup> Ntangu yayi mu ke kukiyufula bantu yikwa ya kubela kele awa na nkokila yayi, bayina kele awa? To Billy kabulaka bisambu. . . ? Ba kabulaka bakalati ya bisambu? [Bampangi me tuba, “Yinga.”—Mu.] Ya kele. Mbote, mu banza ti konso muntu ya kubela kele na kalati ya bisambu, kasi mu zaba ve yina beno sonikaka na zulu ya yawu. Mu banza ti yandi pesaka kaka beno kalati; beno ke sonika yina beno zola na zulu ya yawu. Ya kele

yina? Beno baka kaka kalati; beno sonika na zulu ya yawu nionso yina beno zola.

<sup>114</sup> Mu zaba beno ve. Bantu yikwa awa zaba ti mu zaba beno ve, mpe kasi beno kele ya kubela, mpe beno ke tuba yayi, “Yina mu me kuwa beno kutuba bubu yayi, ‘Nzambi na manima ya bampusu. Nzambi na manima ya mpusu ya muntu, ke fika Yandi mosi’”? Kasi kana beno kele na meso ya kimpeve, beno lenda zibula mpe kumona Yandi, kumona Nani Yandi kele. Mpe beno ke kwikila yawu. Yesu tubaka, “Yandi yina ke kwikila na Munu bisalu yina Mu ke sala yandi mpe ke sala; ya kulutila yayi yandi ke sala, samu ti Mu ke na kwenda na Tata.” Ntangu yayi, kana beno ke kwikila na ntima ya beno ya muvimba!

<sup>115</sup> Bantu yikwa na kati awa yina kele bambevo, mpe zaba ti mu zaba beno ve, zaba yina ke tambula mbote ve na beno? Beno telemisa kaka diboko ya beno, beno tuba, “Mu ke na kubela. Mu kele na nsatu.” Bantu yikwa kele na bansatu na ntima ya bawu, bambevo ve, kasi kele na bansatu? Beno zaba yina mu kele. . . Mbote mingi. Ya kele ve na muntu, ti mu me mona, kasi yina me telemisa diboko ya bawu. Ntangu yayi, mu zaba ve. . .

<sup>116</sup> Mu zaba bakala yayi me vwanda awa. Mu ke banza ti ya kele Mpangi James, mpe mu banza ti yina kele Mpangi-kento James. Mpangi Ben, mu zaba. Kaka bizizi ya beno, bantangu yankaka; mpangi ya bakala ke na kubakaka bafoto. Kasi. . .

Ti muntu kuna na manima awa, na kisika nionso, kaka. . . Mu—mu—mu ke telemisa yayi, na zulu ya Nsangu yayi, mpe na yina mu ke sukisa.

<sup>117</sup> Beno zaba ti Nzambi silaka yayi na kusalama na bilumbu ya nsuka? Yandi salaka nsilulu. Beno me mona? Ntangu yayi mu lenda ve kusala yawu kusalama. Beno me mona, mu—mu lenda ve kusala yawu. Yandi fwana kusala yawu. Yandi kele Yandi Yina ke salaka yawu; munu ve. Kasi mu ke kwikilaka na Yandi, to mu zolaka vwanda ve ya kutelama awa na kutubaka na beno kima mosi yina mu ke kwikila ve. Ntangu yayi, beno sambila, mpe beno tuba, “Mfumu Yesu, ba me longa munu na kati ya Biblia ti Nge kele Nganga-Nzambi ya Ntete malu-malu yayi, yina lenda simbama na kuwa ya bimbevo ya beto.” Mu ke kipe ve kisika beno kele. Mpe beno tuba kaka, “Mu ke kwikila Nge. Mpe, na nzila ya lukwikilu, mu ke kwikila yina muntu yina me tuba bubu yayi.”

<sup>118</sup> Ya kele yina Wanzio tubaka na munu, “Nata bantu na kukwikila na nge.” Mpe kana mu tuba Ndinga ya Nzambi, ya kele ve “kwikila na munu,” ya kele “kwikila Ndinga.”

Kana ya kele ve na Ndinga, na yina beno kwikila yawu ve. Kasi kana beno ke kwikila ti ya kele Ndinga, na yina, nionso yina ya kele, beno sambila mpe beno kwikila, mpe beno mona kana Yandi lenda dyaka kumonisa yina kele na kati ya ntima ya beno.

119 Mpe muntu nionso kuzaba ti Biblia tubaka, ti, “Ndinga ya Nzambi kele ya meno mingi kulutila mbele ya meno zole, mpe ke swasikisa mabanza mpe bansatu na kati ya ntima.”

Ya kele mutindu Abraham zabaka ti ya vwandaka Nzambi, ntangu Yandi zolaka tuba yina Sarah vwandaka tuba na manima na kati ya tenta, yina yandi vwandaka banza; ntangu Yandi tubaka, “Mu ke kwiza tala nge,” mpe Sarah banzaka na kati ya ntima ya yandi, “Ya lenda vwanda mutindu yina ve.”

120 Ntangu yayi, mu tubaka ti Yandi kele awa samu na kubelusa beno. Yinki beno ke banza samu na yawu? Kana beno ke kwikila kaka! Ntangu yayi, mu lenda ve, mu kele na mutindu yankaka ve; Tata ya Mazulu zaba yawu. Beno me mona? Mu fwana kumona kaka yawu. Mpe yina mu ke mona, mu ke tuba; mpe yina mu—mu ke mona ve, kieleka, mu lenda tuba ve. Kasi Yandi ke kaka Nzambi! Yina lenda matisa lukwikilu ya beno, kana Yandi lenda sala yawu?

Na kulongaka mutindu yina, ya ke basisaka munu mwa fioti. Kasi Yandi kele awa. Mu zaba yawu.

121 Na kutalaka bakala mosi mutindu yandi me kulumusa yintu ya yandi, kaka na manima *awa*. Kento ya yandi kele ya kuvwanda pene-pene ya yandi, ke na kusambilaka, mpe. Kaka *awa*. Nge kele na kima na ntima ya nge. Kento ya nge, ke na kusambilaka. Nge kele na kizitu na ntima ya nge. Ya kele samu na bokilo ya nge ya kento. Ya kele kieleka. Nge ke kwikila ti Nzambi lenda tuba na munu yina ke tambula mbote ve na bokilo ya nge ya kento? Mu zaba nge ve. Beto kele banzenza mosi na yankaka. Na yawu ya kele kieleka? Nge ke kwikila ti Nzambi lenda tuba na munu yina ke tambula mbote ve na yandi? Yandi kele awa ve. Mu ke mona kitamina mosi ya nene; yandi kele na esete ya kisika yayi. Yandi kele na Ohio. Ya kele kieleka. Yandi ke na kimbevo ya menga. Lomba na kento ya nge na kunata muswale yina kuna, yina yandi ke na kudililaka, ti yandi kwenda tula yawu na zulu ya yandi. Kutula ntembe ve; yandi ke beluka. Nge ke kwikila yawu?

122 Awa kele na ntwenya mosi ya mama kaka awa ya kuvwanda na ntuala ya munu. Yandi ke na kudililaka. Ya kele na kima ke na kutambula mbote ve na mwana, mu zaba ve. . . Ve, ya kele kima ya yimbi ve. Yandi kele kaka na nsatu mosi. Yandi kele na nsatu ya kuzwa mbotika ya Mpeve-Santu. Ya kele MUTINDU ME TUBA MFUMU. Kwikila, mwana, nge ke kuzwa Yawu. Ya kele kieleka. Kutula ntembe ve.

123 Awa kele na mama mosi ya kuvwanda awa na nsuka ya ndonga. Yandi ke na kusambilaka. Mu kele nzenza samu na yandi, kasi yandi kele ya kufuka na kivudi. Nge vwanda me kuzwa balipaso. Kana beto kele nzenza mosi na yankaka, mu banza. Mu zaba nge ve. Nge zaba munu ve, kana kaka ti nge kuwaka na zulu ya munu. Nge kele ve ya awa. Nge kele

nzenza na kati-kati ya beto. Nge kele ya Wisconsin. Mbanza kele Milwaukee. Mpe mpasi ya nge kele cancer; ya kele na zulu ya dibene. Lipaso na manima ya lipaso, kasi kukondwa mbote. Bika ti lukwikilu, yina simbaka nsongi ya lele ya Yandi, kwikila yawu na ntangu yayi. Kotisa yawu na kati ya ntima ya nge; ya ke salama. Vwanda na lukwikilu!

<sup>124</sup> Bakala mosi me vwanda kuna na nsongi. Yandi ke na kusambilaka samu na mama ya yandi. Yandi kele nzenza samu na munu. Mu zaba yandi ve. Kasi yandi ke na kusambilaka samu na mama ya yandi. Mpe mama ya yandi kele na kima mosi na kento yayi, cancer. To, yandi kele na boma ya yawu, yina ya kele. Ya kele na muntu yina nge ke na kusambilaka, mpe muntu yina kele na mpasi na mukongo ya yandi. Yandi kele, mpe, mu ke mona yandi ya kukola malafu. Yandi kele kinwa-malafu. Mpangi ya nge ya bakala. Nge kele ya awa ve. Nge kele ya Illinois. Nge ke kwikila ti Nzambi lenda tuba na munu yina kele nkumbu ya nge? Farmer. Ya kele kieleka? Telemisa diboko ya nge. Kwikila!

<sup>125</sup> Ya kele na muntu mosi me fukama na ntwala ya muntu, ke na kusambilaka, muntu yina kele ya kulala na mbeto ya bambevo. Mbote mingi. Nge ke kwikila yina nge me kuwa, kuvwanda Kieleka, mama? Nge ke kwikila. Kana mu lendaka belusa nge, mu zolaka kwiza sala yawu. Kasi nge kele yimeni ya kubeluka na nzila ya Klisto, nge me mona. Nge fwana kwikila yawu kaka. Mama yina me telama kuna, yina ke na kusambilaka, vwandaka sambila samu ba simba nge. Mu zaba nge ve, kasi Nzambi zaba nge. Nge kele ya mbanza yankaka, mpe. Ya kele kieleka. Nge kele ya Illinois. Ya kele ya kieleka. Mbanza kele ya kubokila East Moline, na Illinois. Nge kele na mpasi ya cancer. Nge kele kento ya mulongi. Nge ke kwikila? Nge ke kufwa, na kulalaka kuna. Samu na yinki nge ke ndima Yandi ve na nkokila yayi, mpe kutuba, “Mu lenda, na kati ya ntima ya munu, na lukwikilu ya munu na zulu ya nionso yina kele awa, Mu ke kwikila ti mu me beluka. Mu kele na Ntwala ya Nzambi.” Telama, kwikila, mpe vutuka na yinzo mpe beluka. Yandi yina.

Beno ke kwikila na bantima ya beno ya nionso? Beto kumisa Nzambi.

<sup>126</sup> Tata ya Mazulu, beto ke tonda Nge samu na mambote mpe mawete ya Nge nionso. Beto ke tonda Nge, samu, Nge kele dyaka awa, na kati-kati ya mpasi yayi nionso. Na yinza yayi yina me beba, dyaka Nge kele awa. Bika ti Mpeve ya Nge, Mfumu, kuvwanda ntangu nionso na beto. Beto ke mona ti Nge kele awa, Nzambi na mpusu na zulu ya yawu, na kati ya bantima ya muntu; na kupesaka lukwikilu, mpe luzayikisu, mpe vision. Nge kele Nzambi na kati ya Dibundu ya Nge, Nzambi na kati ya bantu ya Nge. Beto ke tonda Nge samu na yayi, Mfumu. Mpe bika ti muntu nionso kukwikila, na nkokila yayi, na ntima mosi, mpe ti bawu beluka. Na Nkumbu ya Yesu Klisto, mu ke sambila. Amen.

<sup>127</sup> Bantu yikwa kuna kele na bakalati ya bisambu, na lweka *yina*? Ti bawu yina kele na lweka *yina*, kuvutuka, kukota mbala mosi na kati ya couloir *yayi*. Bayina na lweka *yina*, beno kwiza mbala mosi na lweka *yayi*, beno baka kaka kisika ya beno, beno kwiza kaka mbala mosi na lweka *yayi*. Ti bayina, na yina kaka bawu ke manisa, ndonga *yayi* kuvukana na lweka yankaka.

<sup>128</sup> Bakuluntu beno kwiza awa. Mpangi Roy, Mfumu kusakumuna nge; mu zabaka ve ti nge vwandaka ya kuvwanda kuna. Mu zola ba-diacre ya dibuundu awa na nswalu, kana bawu lenda kota na kisika yina bawu kele. Beno kwiza awa samu na lusalusu ya fioti.

Mu zola ti mosi na mosi yina ba ke sambila, kutelemisa diboko ya beno, kutuba yayi na manima ya munu:

Mfumu, mu ke kwikila, sadisa kukondwa lukwikilu ya munu. Mu ke kwikila, ti na Mvwandulu ya Nge, na yina mu me landa Ndinga ya Nge, mpe ya munu . . . ntangu maboko ke tulama na zulu ya munu na nkokila yayi, Mu ke ndima kubeluka ya munu, na Nkumbu ya Yesu. Amen.

<sup>129</sup> Nzambi kusakumuna beno. Ntangu yayi beno tala mbote, “Kisambu ya lukwikilu ke vulusa mbevo. Kana bawu tentika maboko ya bawu na zulu ya bambevo, bawu ke beluka.” Yandi tubaka na Noé ti ya ke noka. Yawu ata mbala mosi ve. . . Yandi ata mbala mosi ve, ntangu yayi, Yandi tubaka ata mbala mosi ve, “Na yina—na yina ba ke sambila samu na beno, beno me beluka.” Yandi tubaka, “Bawu ke beluka.”

<sup>130</sup> Yandi tubaka na Noé ti ya ke noka. Ya nokaka ata fioti ve bamvula nkama mosi na makumi zole, kasi ya nokaka.

Yandi tubaka na Abraham ti yandi ke kuzwa bebe na nzila ya Sarah. Ya salamaka ve bamvula makumi zole na tanu, kasi ya salamaka.

Yandi tubaka na Esaie mwense ke kuzwa kivumu. Ya salamaka ve bamvula nkama nana, kasi yandi kuzwaka kivumu.

Ya kele kieleka? Yandi silaka yawu! Ata bantangu yikwa ya bakaka, Yandi salaka yawu, na mutindu nionso. Beno ke kwikila yawu.

<sup>131</sup> Beno kwiza ntangu yayi. Ti Mpangi Capps kutwadisa minkunga. Nge ke kipe bayina kele na bakalati? Ntangu yayi ti muntu nionso kuvwanda na kusambila ntangu yayi.

<sup>132</sup> Tata ya beto ya Mazulu, beto ke tumama na misiku ya Nge na kutentikaka maboko na zulu ya bantu yayi ya kubela. Mu zaba ve kima yankaka yina Nge lendaka sala, Mfumu, samu ti Nge ke tubaka, na Ndinga ya Nge, Nge futaka kubeluka ya bawu. Nge me siamisa ti Nge kele awa na beto na nkokila yayi, Ndinga yina lenda swasikisa mabanza yina kele na kati ya ntima. Nge me siamisa yawu, ti Nge kele na kati -kati ya beto. Mpe mu ke sambila, Nge, Tata, ti Ndinga ya Nge, yina lenda kubwa ve, ke

vwanda kieleka mingi samu na ntima nionso! Ti Nge tubaka, “Kana beno lenda kwikila yawu; beno tula ntembe ve, kasi beno kwikila yawu; beno tuba na mungo yayi, ‘Katuka awa,’ mpe beno sala ntembe ve, kasi beno kwikila ti ya ke salama!” Yandi tubaka ve na wapi ntangu.

<sup>133</sup> Nge tubaka na bantu, na Pentecote, na kumata kuna mpe kuvingila. Nge pesaka ata mbala mosi ve bangunga, bilumbu; Nge tubaka, “tii.” Ntangu yayi ba ke na kwiza na kundima kubeluka ya bawu. Ti bawu banza kima yankaka ve kasi bawu me beluka, tii na luvulusu ke kwiza. Beto ke tumama na Nge na kutentika maboko, na zulu ya bawu, mutindu bakwikidi. Na Nkumbu ya Yesu Klisto. Amen.

<sup>134</sup> Mbote mingi, beno kwiza kaka na ntangu yayi. [Kisika ya mpamba na bande—Mu.] . . nge me beluka. Nzambi sakumuna nge. Kwenda kaka na ntwala. Ya kele mbote . . . ? . . . [Kisika ya mpamba na bande.]

Nionso lenda salama, kwikila kaka;  
Kwikila kaka, kwikila kaka,  
Nionso . . .

Mfumu Yesu, mu ke sambila samu na bamuswale yayi ntangu yayi, na Nkumbu ya Yesu Klisto. Amen.

Mu ke kukiyufula kana beto lendaka soba bampova yayi:

Ntangu yayi mu ke kwikila, ya kele ntangu yayi  
mu ke kwikila,  
Nionso lenda salama, ntangu yayi mu ke  
kwikila;  
Ntangu yayi mu ke kwikila, ntangu yayi mu ke  
kwikila,  
Nionso lenda salama, ntangu yayi mu ke  
kwikila.

<sup>135</sup> Beno ke kwikila ti yina ba me lomba mpe bansatu ya beno ke pesama? Ya ke salama.

<sup>136</sup> Mu me mona, kuluta na mulonga mwa ntangu fioti me luta, mwa bankundi ya munu ya ba-Italien yina me katuka na Chicago. Bantu yikwa zaba Mpangi ya kento Bottazzi ya Chicago? Mbote, beno zaba, yandi vwandaka na dyambu na yintu, yandi lawukaka kaka ntama mingi ve, ya vwandaka kieleka, kieleka mpasi. Kasi na suka kuna na Chicago na madia ya suka ya Bantu ya Mumbongo ya Baklisto, Mu tubaka na mpangi ya kento, na yisi ya ntwadusulu ya Mpeve-Santu. Yandi me vutuka na lweka mosi, mpe yandi vwanda lenda ve kuvwanda swi. Mpe mu tubaka, “Mpangi ya kento, ya ke katukila nge mbangu ve, kasi nge ke beluka.” Mu tubaka, “Ya ke vwanda na bangonda kumi na nana, to na bamvula zole, kaka na kati ya ntangu yina nge ke beluka.”

<sup>137</sup> Kilumbu yankaka yina ntangu mu vwandaka zonga na yandi. . . Mu kuwaka yandi kupesa kimbangi, na kiese mingi, na kiese yina yandi me kuzwaka ntete ve na luzingu ya yandi nionso. Yandi vwandaka nata ditoma. Yandi vwandaka na ngemba ve, Mvwandulu ya Nzambi monanaka ya kuvwanda ntama ya yandi; ya kieleka, ya vwandaka dyambu ya misisa ya yintu, beno zaba; mpe na mbala mosi yandi vutukaka na mupepe ya nene ya kiese, mpe ngolo ya Mpeve-Santu vwandaka na zulu ya yandi. Yandi dilaka, yandi bokaka, yandi—yandi vwandaka. . . Bawu kuzwaka kaka ntangu mosi ya nene, pene ya balumingu tatu to yiya me luta, to ngonda mosi. Mpe mu kuwaka yandi kupesa kimbangi, na Lumingu na manima ya yina me luta, mpe yandi tubaka, “Mpangi Branham, ntangu mu vutukaka, mu sonikaka yawu mpe bakaka bande yina. Mpe ya vwandaka kieleka bangonda kumi na nana, na kilumbu yina.” Amen.

Beno zola Yandi? Yandi kele mbote ve?

<sup>138</sup> Ntangu yayi, Mpeve-Santu mosi yina lenda zabisa na ntwala kieleka, na kukondwaka kuzimbana kilumbu mosi, bamvula nionso yayi; mpe, na nzila ya Ndinga ya Yandi, me meka na kulakisa beno bubu yayi ti Nzambi kele ve mwa kima mosi kele ntama to mwa kima mosi ya masolo. Yandi kele moyo, na ntangu yayi, Ndinga ya Yandi me monisama. Ke bumbama na kati ya vwale ya muntu, na kati ya Dibuundu ya Yandi, na kumonisaka Yandi mosi na nzila ya lukwikilu ya beno mpe lukwikilu ya munu, kintwadi, kukwiza kintwadi, ke sala kimosi ya Nzambi. Mu lenda sala kima mosi ve kukondwa beno; beno lenda sala kima mosi ve kukondwa munu; to kusala kima mosi kukondwa Nzambi. Na yawu, kintwadi ya ke sala kimosi, kuvukana. Nzambi fidisaka munu samu na lukanu; beno ke kwikila yawu; mpe yawu yina me salama. Ya kele kaka yawu, beno me mona, ya me siamisama na mutindu ya kulunga.

Mu ke kipe ve yina kele mbote ve na beno, yina muntu nionso me tuba; kana, na kati ya ntima ya beno, beno ke kwikila ti beno ke beluka, kima mosi ve lenda sukisa yawu. Yandi tubaka mutindu yina. Mpe Yandi tubaka, “Mazulu na ntoto ke luta, kasi Ndinga ya Munu ke kondwa ve.” Beno ke kwikila yawu?

<sup>139</sup> Bantu yikwa ke sambila samu na munu na balukutakanu yankaka yina mu ke kwenda? Mu kele mosi yina kele na nsatu ya bisambu. Beno me mona? Bantu nionso me manga munu, beno me mona, kasi beno, mpe kasi ya kele na Nkuna kele na nganda kuna.

<sup>140</sup> Mu tindaka mukanda mosi na Afrique du Sud. Ba ke pesa munu muswa ve ya kukota kana mu ke tula kidimbu na mukanda mosi ti mu “ke botika, na lweka mosi, muntu nionso bambala tatu; mbala mosi samu na Tata, mpe mbala mosi samu na Mwana, mpe Mpeve-Santu, kizizi na mantwala. Na lweka yankaka, mu

ke botika na manima, mosi samu na Tata . . . Mpe ke longa ti ya vwandaka Malongi.”

Mu sonikaka bawu mukanda. Mu tubaka, “Mpeve-Santu ke na kumekaka, bamvula fioti me luta, samu na kukotisa munu diaka na Afrika. Yandi zola kusadila ministele ya munu kuna kisika bantu mafunda makumi tatu ndimaka Klisto na manima ya midi mosi.” Mu tubaka, “Beno bambuka moyo, menga ya myoyo ya bawu ke vwanda na zulu ya beno, na zulu ya munu ve. Mu me kukipesa na kukwiza, kasi beno zola yawu ve.”

Mu ke kukiyufula yina ya ke vwanda na kilumbu yayi ntangu Yesu, Mwana ya Nzambi me tulama na ngaanda ya dibuundu, Ndinga me losama? Kasi na kati—na kati ya nionso yina, Yandi ke kukitalisa daka Yandi mosi na bantu ya Yandi. Beno ke vutula matondo ve samu na yawu?

<sup>141</sup> Mpe mu me luta kuna, na nkokila yayi, me tula maboko ya munu na zulu ya bawu, na mwa bakento ya kukula, na mwa bantwenya, na mwa biboba, na mwa bantwenya ya babakala, na biboba ya babakala, kaka ya kutoka mutindu mu kele. Mu banzaka, “Ya kuvwanda kuna, ya kuvwanda kuna na kuwa Ndinga yina bayankaka na yinza ke banza kele bulawu.” Beno me mona? Ba kele—ba kele boulon. Beno me mona, Nzambi kele awa samu na kukanga yawu, samu na kubasisa beno na kimbevo ya beno. Ya kele nsilulu ya Ndinga. Beno bambuka kaka moyo, ya ke banda na kusala makelele mingi, “Mu ke benda bawu; kana Mu vwanda ya kuzanguka, Mu ke benda bawu.” Yandi ke basisa yawu na beno. Ya kieleka Yandi ke sala yawu. Beno kwikila kaka na Yandi, beno vwanda na lukwikilu na Yandi. Beno tula ntembe na Yandi ve. Beno kwikila na Yandi.

<sup>142</sup> Beno sambila samu na munu. Ntangu beno kele dyaka na muntu yankaka ve ya kusambila, beno bambuka kaka moyo na munu. Na yina:

Tii beto ke kutana! tii beto ke kutana!

Tii beto ke kutana . . .

Matondo na kukatukaka ntama. Nzambi kukeba beno na yina beno ke vutuka na yinzo!

Tii beto . . .

Beno pesa Baklisto nionso, mbote ya bawu, kubanda nkonga yayi awa. Ngemba ya Nzambi na zulu ya beno! Shalom!

Nzambi vwanda na beno tii beto ke kutana dyaka!

[Mpangi Branham ke na kuyimba na kati ya yinwa *Nzambi Vwanda Na Beno*—Mu.]



... tii beto ke kutana!  
 ... na makulu ya Yesu;  
 Tii beto ke kutana! tii beto ke kutana!  
 Nzambi vwanda na beno tii beto ke kutana  
 dyaka!

<sup>143</sup> Mu kele na kiese mingi. Beno me mona, ya kele na bayankaka, bima mingi yina mu zaba ve, kasi ya kele na bima yankaka yina mu zaba. Mu ke vutula matondo mingi samu na beno. Mu kele na kiese mingi na kusala kintwadi na beno. Mu kele na kiese mingi na kuvwanda mosi ya beno. Nzambi vwanda na beno. Yandi ke vwanda. Yandi ke bika beno ata mbala mosi ve. Yandi ke bika beno ata mbala mosi ve. Yandi ke bika beno ve. Beno me lutila na vwale ntangu yayi. Beno me mona?

<sup>144</sup> Mu kele na kiese mingi na nkokila yayi na kumona Mpangi Palmer, mosi ya ba-pasteur ke salaka kintwadi na beto awa, na Georgie. Mpangi Junior Jackson kele kisika mosi na kati ya kivinga, kuna na nsongi, beto kele na kiese na kuvwanda na yandi. Mpangi Don Ruddell ya kuvwanda awa. Oh, bawu mingi! Mu zaba ve, kana mu me kondwa muntu... Mpangi Ben Bryant awa, mpe mingi ya bayankaka awa, mpangi ya bakala ya mbote, Willard Collins. Beto kele na kiese mingi na kuzwa beno nionso awa.

Mu ke kumiyufula kana beto lenda telema, kaka mwa ntangu fioti ntangu yayi. Beto kulumusa bayintu ya beto ntangu yayi.

Tii beto ke kutana!  
 Tii beto ke kutana na makulu ya Yesu; (Tii beto  
 ke kutana!)  
 ... tii beto ke kutana!  
 Nzambi vwanda na beno tii beto ke kutana  
 dyaka!

<sup>145</sup> Beno ke na kuwa kubelama yina ya kubundana na Mpeve?  
 Beto yimba yawu na kati ya yinwa.

Mu me tala Mpangi McKinney, ya Ohio, na beto. Mpangi John Martin na mpangi ya yandi ya bakala. Kiese mingi na kuvwanda na beno nionso. Ya lenda vwanda mpe ti mu ke mona beno ve, bampangi. Yandi zaba beno.


Tii beto ke kutana!

Ti ntima ya munu mpe ya beno, na ntima ya Nzambi, kuvwanda mosi tii beto ke kutana!

(Mu ke zola kulomba muntu na kwiza kangisa...?. . .)

<sup>146</sup> Na yina beto me kulumusa bayintu ya beto ntangu yayi na kisambu, beto ke meka na kutuba na mulongi nionso ti beto kele na kiese samu bawu me vwanda awa, na bandimi nionso, na beno bantu me katuka na Tennessee, na Ohio, mpe bisika nionso na yinsi. Bakento yankaka mu kutanaka kuna bubu yayi, bawu yina me sala nzila nionso katuka Boston. Bampangi ya beto ya

ndombe vwandaka awa, na suka yayi, yina me katuka kuna mpe. Bawu mingi me katuka bisika yankaka ya yinsi; mu me tonda beno, bankundi ya munu ya luzolo ya kieleka. Nzambi kuvwanda na beno. Mu ke bokila beno nkundi ya munu. Beno ke bambuka moyo na yina Yesu tubaka na zulu ya yawu? “Kele pene-pene mingi kulutila mpangi,” yinga, nkundi.

<sup>147</sup> Na yina beto ke kulumusa bayintu ya beto ntangu yayi (Tii beto ke kutana dyaka na bilumbu fioti, Nzambi kuvwanda na beno.), Mu ke lomba na mpangi ya beto ya mbote, ya kukwikama, Mpangi Richard Blair, kana yandi lenda kwiza kanga na mpova ya kisambu, Mpangi Blair. 

*NDEKE YA NGITUKULU* KNG64-0614E  
(The Oddball)

Nsangu yayi ya Mpangi William Marrion Branham, kulongamaka na Kingelesi, na Lumingu na nokokila, na kilumbu ya 14 na Ngonda ya sambanu, na mvula 1964, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)